

L E

CHASSE-VEROLE

DES PETITS ENFANS.

D E D I E

A L'EXCELLENCE DE TRES-
haute Princesse Madame LEONOR DE
 BOVRBON *Princesse d'Orange.*

P A R

M. CLAUDE CHANVEL
 D. Medecin Aggregé de l'Vniuersité
 fameuse en Medecine.
 d'Auignon.



A LYON,
 PAR BARTHELEMI
 VINCENT.

M. D C. X.

AVEC PRIVILEGE.

THE UNIVERSITY OF CHICAGO

DEPARTMENT OF CHEMISTRY

1924

RECEIVED

FROM THE

LIBRARY OF THE

UNIVERSITY

OF CHICAGO

RECEIVED

FROM THE

LIBRARY OF THE



1924

LIBRARY

UNIVERSITY OF CHICAGO

LIBRARY



A MADAME
MADAME LA PRINCESSE
D'ORANGE.



A D A M E,

*Les lys Royaux, qui
brillent en l'Escusson
de voz armes, mar-
quent assez la grandeur & noblesse
de vostre maison qui tiët les premiers
rangs en la Chrestienté, & l'esclat des
rares perfectiõs diuines & humaines,
que le Ciel à pleine main a prodigué sur
vous, vous faiët autant reluire & ad-
mirer, condignement à l'Excellëce de
vostre extraction sur toutes les autres.*

EPISTRE

Princesses, que la Royale tige de
 Bourbon, dont vous este vn des plus
 fleurissans rameaux, hausse la cyme
 & grandeur, sur les plus hautes &
 illustres familles de l'vniuers. Mais
 tous ces bons-heurs ont esté comblez
 & comme conduits au haut point de
 leur rareté, par le tres-heureux lien
 de mariage, qui avec l'applaudisse-
 ment & alaigresse de toute l'Europe
 vous à tres-heureusement accouplée
 avec M^oseigneur le Prince d'Orange
 vostre trescher & honoré espoux,
 vrayment digne & sortable pair de
 vos grandeurs pour l'admirable con-
 cours des vertus qui l'accompagnent:
 heur qui a conuié les maiestez res-
 chrestiennes du Roy & de la Roynes
 & de tous les grands Princes &
 Seigneurs de la France apres eux

d'en tesmoigner leur liesse & ressentiment, par rares presens & congratulations extraordinaires qu'ils en ont fait à vos excellences: heur dis-ie, qui a comblé de ioye toute la France, & remply de bons espoirs tous voz fideles subiects pour le bien & singulier contentement qu'ils en attendent, & de là sont esclôs, par toutes les villes & places de voz cstats & obéissance, tant de feux de ioye, tant d'ars triôphaux, tât de pœans, d'hymnes & d'hymenees pour vous fœliciter, & à eux vn tant soubaictable & heureux rencontre. Pour ma part, i'en tesmoignay pour lors selon mon petit possible, comme vostre originaire subiect, la grandeur de mon ressentiment, par quelque petite poësie latine heroique: que l'ardeur & vehemence du con-

E P I T R E

tentement fit enfanter à ma muse
 des ia brehaine en la froideur de sa
 vieillesse, aux fins de vous presenter
 tres-humblement & tres-affection-
 nement la foiblesse de mon petit ser-
 uice, comme à mes Princes & souue-
 rains seigneurs. Mais ne me sentant
 par ceste simple oblation acquiter à
 plein du deuoir, auquel la nature, &
 plus la singularité de vos perfections
 m'obligent, si de surplus ie ne signa-
 lois par quelques seruice reel ceste miè-
 ne bõne volonté. La raison & le tẽps
 m'en fournit ce me semble vn subiect
 oportũ d'en faire essay à l'occasion du
 mal courant de la petite verolle, qui
 depuis quelques années a faict vn
 grand butin des ieunes enfans & au-
 tres plus aagez par toute l'estendue
 de ce Royaume: Laquelle sçachãt que

vous craignez & apprehendez, pour
 bonnes occasions, & la pratique heu-
 reuse, Dieu graces, en la cure de ceste
 maladie & autres pires depuis qua-
 rante ans que ie fay profession de
 medecine en plusieurs bonnes villes,
 m'ayant enseigné plusieurs beaux se-
 crets & tres-assurez remedes, par
 moy methodiquement inuentez &
 heureusement experimentez, selon la
 doctrine des plus anciens & fameux
 autheurs de nostre science & expe-
 rience de noz M. & docteurs mo-
 dernes pour la guerison facile & prô-
 pte de toutes maladies: Je les ay re-
 ueuz, repesez & particulièrement de
 cette cy, & diligemment redigez par
 escript & methode en quatre liures,
 pour les presenter à vostre excellence,
 à fin que selon les vœux que ie faiet

EPISTRE

tous les iours pour la prosperité &
 santé d'icelle, avec la faueur du ciel,
 vostre preuoyance, & assistance de
 Mess. voz Medecins ordinaires, ayant
 de surcroist ce conseil riere vous si par
 disgrâce (ce que Dieu ne permette)
 ce mal vous assailloit derechet ou
 quelqu'un de ceux qui vous appar-
 tiennent, vous ayez ces remedes
 prompts & prests pour le combattre
 & dechasser sans grande fustierie,
 & sans interest des beautez & gra-
 ces dût le ciel vous à doüce. Vostre cle-
 mence & debonaireté naturelle &
 hereditaire à ceux du sang de Bour-
 bon, Madame, me promet que vous
 agréerez & l'intention & l'ouurage
 de l'Auth eur, qui tiendra pour vne
 singuliere faueur & obligation s'il
 vous plaist de receuoir ce gage. Et

EPISTRE

hyppothèque, ou seruice qu'il desire de
 vous continuer, à l'imitation & taci-
 te inuitation de ses majeurs, desquels
 son ayeul eut iadis l'honneur de ser-
 uir de medecin à vn de Messeigneurs
 voz predecesseurs Prince d'Orange,
 Ville qui sous l'air de vostre sage cõ-
 duicte reprend la face & en bõ point
 qu'elle auoit pour lors. En laquelle il
 s'arresta du depuis & print party, &
 d'ou le bon-heur m'a fait naistre vo-
 stre originaire subiect & vassal, &
 pourtant tres-obligé à seruir voz ex-
 cellences: & qui faict que ces premiers
 fruiets & prēmices de mes labours
 vous soyent deuës & consacrées com-
 me creues en vostre terre, & qu'à
 l'abbry, sauuegarde, & protection
 d'icelles elles voyent & seruent le pu-
 blic François, contre toute iniure &

EPISTRE

enuie. Ce que ie requiers tres-humblement voz excellences, & de permettre qu'elles portent voz noms, s'il leur plaist, sur leur front, comme vn passe-port par toute la France pour estre bien-venues & profitablement receues, & comme vn seau & marque tres-fidele à tout le monde, que ie suis avec tous les miens entierement & de tout mon cœur de voz excellences.

**Vostre tres-humble, tres-obeïssant, & tres-fidelle seruiteur sujet & Vassal.
C. CHANVEL Docteur
Medecin.**



MI Lecteur, i'ay cō-
posé & mis en lumie-
re , à la sollicitation
& suasiō de plusieurs
bons Seigneurs &
amys miēs, ce petit traicté de la pe-
tite verole , qui violente pour la
pluspart iusqu'à la mort les petits
enfans & plusieurs grandelets &
aduancez en aage en c'est infortu-
né siecle : à l'imitation & exēple de
feu Messieurs Rondeler & Ioubert,
Conseilliers du Roy , professeurs
Chancelliers & Doyens successiue-
mēt en son Vniuersité de Montpe-
slier , mes maistres & Docteurs en
icelle dés l'année. 1562. iusqu'a 1566.
Ayant lors escript de la grosse ve-
role , par laquelle la souueraine
Majesté de Dieu chastioit extre-
mement par le fleau de son ire vē-
geresse les miserables & impudi-

ques luxurieux. Comme dès plusieurs années en ça, il a visité, vn nombre indicible des prouinces de la Frâce, Citez, familles, & maisons de ceste petite verole. A ce faire m'a incité son tant contagieux & populaire cours, exerçant si cruellement en ce temps sa tyrannie cōtre ce petit & tendre subiect. Quoy que ié sache tresbien, qu'il ne manque à plusieurs conseil & adistance de beaucoup de doctes Medecins & experimentés, suyuant les Auteurs qui en ont escript chascū en sa lāgue ou Arabesque ou Grecque ou Latine: Mais ils ne se sōt vouluz manciper & assubiectir si bas, que de s'arrester à tant de petites considerations, qui peuuent concerner le subiet de l'enfant chagrin, phantastique & bigearre; s'estant plustost arrestez és choses vniuerselles & questions physiques. Et ne se trouuent entre noz modernes aucuns

aucteurs, qui ayent voulu esplucher
par le menu la conduicte & guerisõ
de ce mal tant importun en nostre
langue vulgaire & maternelle Frã-
coyse, pour en laisser l'intelligence
à chascun auquel le faict touche
pour seruir d'instruction à l'ignorã-
ce incredulité & mesfiance, & d'a-
dresser à l'opiniaistreté & resuerie de
plusieurs femmelettes qui font des
entendues & magnifiques docto-
resses pour disputer trop audacieu-
sement cõtre les Axiomes & Theo-
remes de la methode medicinale
& principalement sur le faict de la
saignée & purgation faisables à
tẽps deu, qui est cause du desordre
de la mort & deuil frequent qu'on
porte pour ces enfancõs, pour n'al-
ler que lentement & trop tard au
cõseil & ayde des doctes Medecins
pour s'en ayder à propos, ayants
mieux croire leurs indiscrettes opi-
nions, qu'il ne leur faut rien faire
cargob & que


& que le laiët, les potages & bons vins, & les tenir chauds leur fuffit. Or le pire eft qu'elles en font croire à plusieurs groffiers Medecins & Apothicaires & Barbiers de village ignorants & idiots (pour la plus part) qui leur complaifent de peur de perdre leurs bonnes graces entree & pratique de leur maifon. Ce qui fe cognoit au mefpris qu'ils fõt des bons & methodiques remedes & indications d'iceux conuenables à vn mal fi dangereux. Que donc & lefdictes femmes & leurs feëtaires empyriques & autres qui n'ont accouftumé que leurs vieilles games & plains châts pleins de fauffes notes & difsonâts accords ou pluftoft difcords aux aureilles des doctes, fe corrigent & donnent lieu à la fciëce, raifon & experience de ceux qui ont efcrit doctement & pratiqué heureufement, qu'icelles avec ceux la fe conduifent par les Docteurs

dogma

dogmatiques, & rationels, qui suy-
uent Hippocrate, Galen, Aëce, &
Auicenne, & leurs semblables an-
ciens & modernes, & non les Para-
celsites, charlatans, & empyriques
ignorants, pour nous ayder, secon-
der, & deuancer, mesmes par leurs
conseils & inuentiōs methodiques,
à mettre à neant vne telle pestilen-
ce qui rauage si cruellement ce pe-
tit peuple par sō epidemique & po-
pulaire brigandage, à faute de la de-
fence tutelaire de vrays tuteurs &
fideles curateurs: & par ce moyen
feront cesser les plainctes, lamenta-
tions & regrets de tant de tristes &
affligez parens despourueuz de si
grād nombre de leurs enfans, cou-
sins, & nepueux. Sur ce faiēt i'ayme
mieux encourir la calomnie & en-
uie de certains nais plustost à mes-
dire & detracter des œuures d'au-
truy, que de les deuancer ou imiter
vertueusement: que non pas de cō-
battre

battre contre mon debuoir & syn-
derefse de ma conscience, en deniât
d'ayder & deffendre celuy auquel
auec l'assistance & benediction de
Dieu ie peux sauuer la vie. Comme
i'espere que feray à plusieurs par ce
mien petit œeuure, accompagnée de
la faueur & cōduicte des bons Do-
cteurs Medecins, que ie sçay estre
entierement alienez de toute passio
d'enuie & mesdisance. Auxquels ie
supplieray croire que ie ne pretends
faire deffaing d'escrire pour eux, en
voulant enseigner Minerue, d'autat
qu'ils ont asles de science & de con-
seil chez eux & nombre d'Aucteurs
& liures plus suffisants, & plus pro-
fonds que ce mien petit. Moings ie
me suis pleu à complaire aux cu-
rieux, en inferât icy des problemes
& questions pleines d'ostentation
& non necessaires, n'y aucuns pro-
legomenes ou discours parergues
& inutiles. Car mon intention est
seule

seulement de contenter les misera-
bles Peres & Meres qui courent
hazard de perdre iournellement
leurs enfans, par l'office de charité
qui m'oblige d'employer pour eux
ce qu'il a plu à Dieu m'en reueler
& despartir pour leur chercher la
voye de santé, & longue vie avec sa
grace. Ce que tascheray de faire
en ce Traicté que i'appelle Chasse-
verole, party en quatre liures, pour
plus facile doctrine & chapitres di-
stinguans les matieres qui y sont
deduictes.



A MONSIEVR,
MONSIEVR CONNAIN
DOCTEUR EN MEDECINE
A LYON.



MONSIEVR. Sur les
plus violens accez d'une
commune maladie
dont ce pays fust atteint
l'année dernière à l'en-
droit des petits enfans,

esmen des cuisantes douleurs des peres &
meres, & grossi de leurs sanglots, ie con-
çeus ce mien petit fruiçt que ie nourrissois
depuis riere moy pour leur en faire vn don
quand il auroit pris son accroissement. Mais
craignant qu'il ne fut mal traité par l'in-
iure de ce siecle, qui, comme vne printem-
niere bruine, va ordinairement dega-
stant les tendres bourgeons qu'une meil-
leure saison veut pousser en avant, ie le
tenois à couuert & auois quasi enuie de le
s'ppri

supprimer. Toutefois pour deferer aux
prieres de mes amis, & ne voir frustrer
les Peres & Meres du secours & soula-
gement qu'ils en pourront tirer, ie me
suis disposé à le mettre au iour. Ayant d'oc
à l'exposer en veuë & considerant qu'il
pourroit encor auoir beaucoup de traiçts
mal polis qui le rendroyent difforme & de
mauuaise grace, ie me suis resouenu de
vostre ancienne amitié & bienueillance;
sur laquelle fondé & asseuré, j'ay pris cou-
rage de le vous faire voir, à ce qu'estant
manié, redressé, & comme lesché par vous,
il paroisse plus librement en public & soit
mieux veu de tous. Ie vous le remets, & le
mets quant & quant à l'espreuue de vostre
clair & subtil iugement: S'il n'en peut sup-
porter les rayons, que plustost, comme le
phœnix, il se brusle & consomme heuren-
sement au Soleil de vos perfections, à fin
qu'il renaisse de nouueau plus parfaict &
accompli qu'il n'auroit esté au parauant.
La splendeur de vostre erudition luy re-
dorera ses plumes & l'esmail de tant de
vif

vifues sciences colorera ses aïles & le rē-
dra plus agreable à voir. Et s'il vous
plaist par apres le laisser sortir d'entre vos
mains & luy faire encommencer sa vollee
à l'abry de vostre reputation, portant au
front ceste lettre d'adresse : Je ne doute
point que partout où il passera il ne soit
plus favorablement accueilli. Ainsi vous
luy aurez donné la vie, la vigueur, & la
grace. Que s'il m'en reuient quelque lou-
ge, elle retournera tousiours à vous, puis-
que de vous il aura pris son estre & sa
perfection, & que ie suis.

De Carpentras le 26.

d'Auril. 1609.

MONSIEUR,

Vostre tres-affectionné,
seruiteur & amy,

C. CHANVEL.

Ad virum Doctissimum D. C.
Chamuelium Doctorem Me-
dicum, in eius Varioli-fugam,

Epigramma.

Verbera, qui, natos emendatura nocentes,
Edocuit patres, dicitur esse Sopsus.
Chrysippum hūc referunt. Verūm, curare nocētes.
Morbillos puerūm, qui docet, is Medicus.
Et verè: nam, qui proteruos cadere suadet,
- Infligit pœnam, non fugat ille malum.
At qui sanguineis adhibet medicamina morbis,
Doctus Appollineâ pellit is arte malum.
Ergo Chrysippo es multum laudatior: ille
Inuenit pœna; ipse, fugare doces.

AVTAVOM

T. C. D. M.



ANAGRAMMA

CLAVDIVS CHANVELIVS
MEDICVS.

VNICVS LAVDIS MEDICAE
CHYLVS.

*Non ita marcescant defeſta ſanguine vena,
Non ita ſe Chylo fomite ſanguis alar:*

VNICVS Vt MEDICAE LAVDIS in nomi-
ne CHYLVS

Ipo eſ:quo,medica res,vegetante,vigent.

PHILIBERTVS
MONETVS.

Stances au meſme.

*Hippocrate chaffoit de Grece
Et du terroir Athenien
Cet air peſtillent qui oppreſſe
Tant le ieune que l'ancien,
Allumant des feux par les rues
Et des parfuns iuſques aux nues.*

*Chanuel, l'honneur de noſtre Aage,
Entre les nepueux d'Apollon
Orné d'une doctrine ſage
Combat ores ce mal ſelon
Qui deſpeuple dedans les villes
D'enſans la pluſpart des familles.*

Il chasse avec maint Antidote
La verolle en ces beaux discours
Et pour la Guerir il apporte
De grands remedes aux secours.
Qui eterniseront sa gloyre
Dedans le Temple de Memoyre.

Dessus les Autels de ce temple est
Pour luy ie veux peindre ces vers.
CHANVEL, des doctes l'exemple,
Sois tu porte par l'univers
Sur le char de la Renommee
Que tes escripts ont animee.

Y. C. D. M.

ÆTATIS SUE 63.



CLAUDE CHANEVEL

DOCTEUR MEDECIN AGGREGÉ.

D'Auignon

100,000 to 150,000

100,000 to 150,000



LE
CHASSEVEROLLE
DES PETITS ENFANS,

COMPOSE' EN FRANCOIS
POVR LE SOVLAGEMENT
du peuple de France & ses
circonuoyfins.

LIVRE PREMIER.

*Que la petite verolle est maladie propre
aux enfans, & de quel nom se deriue, &
de sa distinction avec les Varons.*

CHAPITRE PREMIER.

VE V que c'est chose
toute assuree, qu'il y
a certaines & parti-
culieres maladies, qui
affligent & trauaillēt
seulement les petits enfans, soyent

internes, foyent externes , & aucunes tout le corps , autres vne seule partie: Nous voyons par experience que la petite verolle de laquelle nous pretendōs discourir en ce petit traitté (avec l'assistance de la grace diuine) est du nombre de celles, qui prouchantes de repletion assailent, nō seulement vne partie, mais tout le corps mesmes generalemēt, ainsi qu'il se void par leur bourgeonnement sortant par la peau, qui le couure & enuelope tout par le dehors, & se sent en plusieurs parties, & mesmes toutes affligées, plus les vnes, que les autres, non seulement hors iceluy, mais par fois dedans mesmes. Or ce terme de verolle est deriué d'un nom Latin qui est dict *Vari varorū*, au pluriel s'appellant en Græc *ἰοῦβόι ἀπὸ τῶ ἰὺβὼν*, id est, *fimo*, quia *instar fimi faciem conspurcat*, ac *fecdat*, aīçauoir petits varons, tubercules ou enleueures dures & noiraītres,

ou

ou rouges qui viennent en la face, & des hommes & des femmes provenâs d'un humeur parfois, sâguin, subtil & cholerique, & par fois crasse, pituiteux, ou melancholique. Et pource qu'en la verolle petite comme en la grosse se voyent ces pustules & enleueures dures comme varons, & toutesfois beaucoup differentes entre elles en certaines conditions, de là est aduenu qu'on a appelé ces exitures & bossètes esleuées au cuir des petits enfans de ce nom de verolle, qu'on pourroit appeller petits varons, ou boutons, ou *Cosses* en Italien. Mais la difference est pour oster l'homonymie, ou æquiuocation, que lesdits varons, ne se treuvent qu'en la face de quelques vns abondans en sang cholerique, chaud, pituiteux ou melancholique; mais les enleueures & bossètes de la petite verolle des enfans, sont generalement & confusé-

ment esparſes par toute la peau du corps d'iceux, & non ſeulement en l'externe, ains meſmes en l'interne, & des yeux, & oreilles, nez, & gorge, Et quelque-fois ſi la malice eſt grande & le ſubiet n'eſt bien con-
tregardé de l'air froid & venteux & reglé és autres choſes non nature-
les, ſaigné & purgé à temps, d'où elle ſe retient en dedans & eſt arreſtée & repouſſée en la trachée artere, & en la ſubſtance du poulmon, & autres parties pres du cœur, dans la poi-
trine, ſept tranſuerſe, foye, ratele, mezantere, & inteſtins ou boyaux; & alors cauſe vne infinité de ſym-
ptomes & accidés mortels, ſ'il n'y a prompt ſecours par le cōſeil du docteur
experimēté & charitable Medecin, avec le ſeruice de ſes ſeruiteurs, & ad-
iſtans ſ'employans deüiēmēt par les ſuſdits remedes, & ſuyuant l'or-
dre requiſ & neceſſaire des choſes externes à la curation dudit mal.

*Des accidēs qui accompagnent & suyuent
la petite verolle principalement.*

C H A P. II.

Ces symptomes ou accidēs, sont. La douleur de teste, spasme, frenesie, delire, & resuerie, la tache ou maille en la pupille & tunique adnate ou cōionctiue des yeux, aphtes & vlcères en la gorge ou trachie arteré & dedans du gosier, Oesophage, ou conduit des viandes, & ventricule receptacles d'icelles, schi-nance, toux & raucité suyuant la perineumonie ou inflammatio des polmons; avec inflammation aussi des parties nobles, ou intemperature d'icelles situes dans ladicte poitrine, lieu & place des facultez vitales distinguees par ledict septe transversal, des parties & facultez natureles logees en la region de l'Epigastre & Hypogastre contenus

par le peritoine ou peau enuelop-
 pant tous lesdicts ventres haut &
 bas, dans laquelle se trouuās le foye,
 mezantere, ratelle, & intestins, se
 sentent le plus souuent extrememēt
 affligez, si l'on n'y pouruoit de bon-
 heure, comme aux susdictes parties
 animales & vitales, par les remedes
 generaux de la Diette Chirurgie &
 Pharmacie. De tous lesquels acci-
 dens, ou des plus importans nous
 ferons cy apres mention distincte-
 ment & peculierement, ayant trai-
 cté la curation du mal principal de
 ladiete verolle.

*De la difference qui est entre la petite &
 grosse verolle appelée mal
 de Naples.*

C H A P. III.

AV reste ceste verolle s'appelle
 petite à la differēce de la gros-
 se verolle appelée communement
 ma

maladie Venerienne, laquelle naquait & commença à paroistre en nostre Europe au temps du siege de Naples l'an mil quatre cens nonâte quatre, & ce de diuerses causes selon diuers auteurs: Et toutesfois vrayement venüe de la contagion des Indiens & Indiennes, ou leurs circonstås voisins, au pays desquels elle a grand cours, & s'y guërissent par les decoctions du bois indique ou gayac (en contrechange de laquelle grosse se lit que les nostres les estrennerent & infecterēt de ceste petite verolle, non iamais veüe ny sentie auparauāt parmy eux) nos peres ou leurs enfans se treuans là & la cōmuniquāt aux leurs, lesdicts Barbares se meslans avec les Chrestiens qui estoient audit siege trop familiarement, & communiquans ou cohabitans charnellement ensemble dont furēt punis de leur péché par ce mal-heureux fleau de la

iustice diuine, estant appellée grosse verolle à cause des gros varons qui leur naissoient par tout le corps en façon de pustules malignes, puantes & contagieuses, que lesdicts Indiens appellent en leur iargon & langage naturel Bubes, d'ou est venu le terme des boüyes de Naples, & bubons Veneriens, & bien grand nombre d'autres symptomes, & accidés dudit mal, de laquelle ne pretens parler d'auantage, ains seulement de la petite en laissant le plus grand discours de laditte grosse aux auteurs tres-doctes qui en ont escript amplement & escriuent tous les iours.

De la definition ou description de la petite verolle & de ses especes.

C H A P. I V.

DOnques la petite verolle est vne excretion bourgeonnement

ment ou fleurissement en façon de boutons sortis spontanément & de leur gré és corps des hommes, & sur tout des petits enfans, & autres grands avec prurit ou desmangezon, & purulente matiere ou ai-queuse sortant d'iceux, leur suruenant en maniere de crise, en certaine fièvre maligne, à la façon des maladies epidemiques & cōtagieuses. Ceste description assez longue, plustost que briefue definition posée, & establie, il faut venir à la partition ou diuision desdictes excretions ou boutons veroliques. Or elles sont de trois sortes. Car il y en a des grolletes rouges comme petits phlegmons, procedans de la domination de la matiere sanguine, fort druës, & espesses, & celles là portent le tiltre de la vraye petite verolle. Il y en y a yne autre espeece, qui sort en façon de bossettes blanchastres ou fort peu rouges en façon de vescies.

faictes comme par eschaubouilleure de la grosseur de feues ou faziols, ou petites auclaines qui sont celles que Pline appelle *pituitæ eruptiones*, & par le vulgaire de Prouëcé ou Languedoc Esclates, pource qu'elles s'esclatent & ouurent d'elles mesmes aysément & en peu de iours, n'estât si fascheuses comme les susdictes. Et la tierce espeece prouenant de sang cholerique chaud & subtil, fait vne superficielle tumeur & enleueure sur la peau, qui se sent comme raboteuse & rude en la maniât, & poinctüe: Et ceste cy est le *sinapion* picquant & eschaufant la peau cōme graine de moustarde puluerisée & appliquée sur icelle, de laquelle elle porte le nom, s'appellant en Latin *sinapi*, & en France s'appelle la rougeole ou picote, pource que ceux qui l'ont sont excessiuellement rouges, en la face & sur tout pres des yeux, avec sentimēt de grāds epoinsonne

sonnemens & chaleurs, laquelle s'evapore & se perd tost apres, sans ietter autre matiere que par les sueurs, ou insensible transpiration, tât leur matiere est chaude, subtile & cholérique: Je laisse les morbilles à part, ou petechies appellées par les Italiens & par le vulgaire de France le pourpre ou le tac rouge, qui se void és fieures malignes & quasi pestilentes ou le tac violet, verd, ou noir apparoissant és pestilentes mesmes, & comme vn vray caractere & signe de la peste, portant mesmes ce nom d'exantheme ou morbilles, & ressemblant l'un & l'autre aux vestiges & trace des piqueures de pulces, desquels n'ay entrepris de parler en ce lieu, (mais biẽ cy apres amplement) ains seulement des trois especes premieres, qui sont avec grosse ou petite tumeur, & autres adioincts contenus en la description susdicte.

Du propre nom de ladiète verolle selon les
anciens modernes, & de la cause
conioncte d'icelle.

CHAP. V.

LE propre nom desdictes excres-
tions & boutons d'icelles s'ap-
elle par les Grecs, *Exāthemata*, c'est
à dire, bourgeonnements & fleurif-
semens selō Galen au liure cinqiē-
me chapit. II. de son art curatoire à
Glaſcon, & *Ecthymata*, selon Hyp-
pocrates au troiziēme liure des
Epydemies ou maladies populaires.
Plin les appelle *papula*, & *pustula eru-
ptiones*: Auicennas, Zoarus, Isaccus,
& autres Medecins Arabes les ap-
pellēt *Morbilli*: Estans tous de ceste
opiniō, quand à leur cause naturelle
& conioincte, qu'elles se font de la
corruption & malignité du sang
mēstruel, de là moins mauuaise par-
tie duquel chascun des hōmes, nay
de

de femme, a esté faict en partie, & nourry en la matrice de sa mere, luy demeurant apres sa naissance quelque reste de ladiete corruption, qui le rend disposé à produire avec le temps, & porter tels bourgeonnemens & boutons veroliques: Les susdicts auteurs Arabes, & ceux qui ont suiuy leurs traces soustiennent ceste opiniō, qu'ils fondent sur vne certaine Analogie, ou comparaizon de nos humeurs avec la liqueur & suc des plantes & fruiets succulens. Car comme ausdicts suc desdictes choses naturelles se contiennēt les trois genres d'excremēs, l'un se ressentant de la terre qui est comme la lie au vin; L'autre de l'air qui respōd à la fleur dudiēt vin; & le tiers crud & non bien cuit, de l'eau qui avec le tēps venāt à s'eschauffer faict bouillir lesdicts suc, ou humiditez crues: tout ainsi se void qu'ēs entrailles, & parties principales & humeurs con-

tenus dans les grands vaisseaux des veines des enfans, outre la concurrence des deux semences, sont forgées & nourries du sang maternel, & menstruel, qui (à cause de l'oyfiveté de la mere, & imbecillité de sa chaleur, demeurant plus aigueus & impur,) fait que le corps dudit enfant est souillé & comme farcy, & plein de plusieurs superfluitez, lesquelles alors eschaufées par quelques fieures suruenâtes en la masse du sang ou parties pres du cœur sôt poussées & reiettées en la peau. Ainsi qu'on void se faire aux vaisseaux pleins de moust lors qu'ils bouillent, reiettans leurs ordures & crasses, & se purgeans d'icelles, les repandent par dessus leurs bondons & ouuertures cōme escumes bouillonnantes, qu'on ne repousse en dedans aucunemēt, ains on donne air au vaisseau contenant ledit moust, pour empescher seulement ledit

exorbitant boüillonnement. Aussi de mesmes lescits pustules & boutons de la verolle poussez dehors par l'œuure, & effort de la nature, qui se deschargeât cōme par Crise & termination de l'intolerable malignité d'icelles, les change, & trās-met aux parties les plus ignobles, externes, & ouuertes ou percées cōme sont les deux peaux du corps appelez Epiderme, & derme, nous enueloppans, & seruās d'emonctoïre & comme mouchoir vniuersel, & externe à tout nostre corps : ou seroit lors que se trouuant trop debile empeschée & non aydee à leurs sorties elles demeurent, & s'arrestent en dedans à son grand dommage & danger, ausquels ils appartient aux Medecins, prouuoir pour ayder & aduancer leurs sorties en ladicte peau par leur conseil bien executé comme se dira cy apres.

*Discours sur la controuerse de la cause
coniointe de la petite verolle.*

C H A P. V I.

ET combiẽ qu'il y ayt quelques
vns qui tiennent la cause de tel
mal prouenir de la nourriture mau-
uaise du laiẽt de la nourrice mal cõ-
ditionné, ou se corrompant en l'en-
fant diuersement, & laissant ceste
impressiõ en tous ses mẽbres inter-
nes & externes apres ladiẽte nour-
riture. Et autres qui pensent icelle
proceder de la corruptiõ de laquel-
le l'Embryon non formé, & organi-
sé totalement, ou enfançon nõ nay,
s'est imbu & abreué durant le tẽps
qu'il a esté porté comme nageant,
& flottant dans les lochies ou eaux
corrompues & contenuës dans le
circuit & entourement de la mem-
brane Atlantoyde, & autres, entre
lesquelles elle est située dans la ma-
trice

trice de la femme; Et qu'aucuns aussi
affermēt, que ceste corruption pro-
cede de ce que l'enfant a esté con-
ceu pendēt le temps que la matrice
de sa mere n'a laissé escouler les
fleurs & vuidanges mēstruelles d'i-
celle: Si est-ce qu'ayant bien fondé
les opinions susdites, nulle desdites
deux causes peut auoir lieu en l'es-
chole & tribunal de la verité, Car
tout laiēt n'est mauuais, ny mal qua-
lifié, Et s'il y a quelque vice ou im-
perfection en iceluy, la chaleur na-
turelle de l'enfant le dompte, & il
s'en purge iournellement, par ses
ordinaires excrements, mesmes par
les gratelles, roignes, & galles, ou
achores, ou tigne, & petites vlce-
res, ou croustes appellees lactumes
venants & naissāts en la teste & vi-
sage desdits enfans durant le temps
qu'ils tettent. Et d'ailleurs lesdits
membres internes & externes d'i-
ceux, se purgent dans les mesmes
caux

dās lesquelles ils nagent & sont suspendus, qui se font par leurs sueurs & vrines, & les ont tellemēt accoustumées, qu'ils en sentent plustost commodité, qu'incommodité, tant durant leur portée qu'au temps de leur issuë, de ladiëte matrice. Parquoy n'y ledit laiët, n'y lesdictes eaux, comme eštāt choses accidentaires & hors la cōposition & conformation du corps des enfans, ne leur peuuent apporter ceste naturelle & congenée impureté.

*Continuation dudit discours & conclusion
sur ladiëte cause conioinëte dudit mal
preuuee par raison, & authorité.*

CHAP. VII.

PLustost pourroit estre la troisiëme opinion de leur conceptiō, pendant les fleurs menstruelles de leur mere la cause de ladiëte corruption

ption precedente & emmēnante apres ladicte verolle , mais elle ne peut estre admise , d'autant qu'il faudroit que seulement ceux , qui sont conçus pendant ledit decoulement, y feussent subiects. Et toutesfois presque tous sont conceus, icelles estant presque entierement cessees, ou deuant qu'elles viennent sur le point de leur retour, la matrice demeurāt presque en ce cas nette apres le passage & arrest d'icelles, & au dernier cas ledit sang menstruel n'ayant peu acquerir autrement mauuaise qualite à cause de son court sejour ou nō complet n'y totalement transcoulé par les cotiledons ou bout des veines abboutissans dans les parois internes de la cavité ou fonds interieur de la matrice, ou par iceux entierement y portez alors. Dauantage il se sçait communement que les Iuifs ne s'assemblēt avec leur femmes qu'elles
ne

ne soient du tout nettes, & que bon nombre de iours ne foyent passez pour se purifier à leur mode, & coutume; elles se faisant tremper, & cōme elles disēt cabusser en l'eau froide par plusieurs fois iusques par dessus la teste dās leur baignoir froid, s'estāt au preallable baignées & lavées d'eau chaude en la chambre situee prez ledict baignoir dans vne tine ou cuue, pour se rendre entièrement nettes de l'infection d'icelles, comme on tient pour seur qu'elles font en ce païs du Contat Venaisin, où les Iuifs, & Iuifues habitent, sur tout en fort grand nombre en la Ville d'Auignon, Carpentras, Cauaillon, Vaison, & autres, par la permission & clemence de nostre S. pere le Pape, & Archeuesque & Euesques desdictes villes, les inuitans & attendans iournellement à leur conuersion au Christianisme. Aussi void-on par experience, que leur

enfants

enfans en sont fort cruellemēt tra-
uaillez. Doncques il n'en faut rap-
porter la cause à ladicte conception
pendant lesdicts fleurs, moins à au-
cunes des deux susdictes. Mais seu-
lement & necessairement au sang
mēstruel arresté apres la cōception
de l'enfant de la moins mauuaise
partie duquel il est apres nourry &
perfectionné. Au demeurant ie lais-
se en arriere plusieurs autres opi-
nions de beaucoup de doctes hom-
mes, sur la cause de ce mal, & entre
autres celle de *Hieronymus Mercurialis*
(que i'ay familieremēt cogneu pro-
fesseur de l'vniuersité de Boulōgne
la grasse, au voyage que i'y fis l'an
1599.) que ie ne veux tirer en con-
trouerse, pour l'honneur de l'inti-
me amitié, qu'il y auoit entre luy &
moy. Car l'attribuant à vn aēr vitié
& contamināt les hommes & peres
des enfans, au commencement &
temps premier, auquel elle parust
sont
ont

ont transferé ceste tache & comme
propriété paternelle à iceux, cōme
à fils heritiers d'icelle. Je laisse aussi
celles de Fernel, Fusche, Manard,
Albert le grand, Alexander Petro-
nius Medecin Romain, contre les-
quels il dispute doctement, pour ré-
uerfer leur opinion & establir la siē-
ne pour legitime & vraye, comme se
void dās son liure des maladies des
enfans chap. 2. du liure 1. Mais mon-
sieur Andre de Laurens que i'ho-
nore entre tous les Medecins, pour
sa grand'doctrine, rares vertus & a-
mitié qu'il m'a porte tousiours &
aux miēs, tref-digne Medecin, pre-
mier de la Maiesté de nostre Roy
de France tres Chrestien & tres in-
uincible Henry III. renuerse l'opi-
nion dudiēt Mercurialis, & autres
fusdiēt apres luy en son Anatomie
liure second question 21. confirmāt
la nostre du sang menstruel en ce
mesme lieu: comme aussi faict Ma-
thiol

en ses Epistres, disputant au long & au large contre les opiniõs contraires à la nostre, qui est la plus cõmune, meilleure, & mieux fondée, sur raison au liure 3. en l'Epistre mandée à Michaël Florinus.

Confirmation de ladiçte conclusion & de la douteuse preservation de ladiçte petite verolle.

C H A P. VIII.

PARquoy ne faut s'opiniastrer à croire le cõtraire, veu que la cõmune sentence & arrest du vulgaire des Medecins anciens & modernes les plus doctes y consentent & reçoivent nostre conclusion pour vraye: & que le conseil d'Aristoteles porte que le commun bruit & opinion n'a pas accoustumé d'estre entièrement faux, vain ny menteur. Aussi qu'il n'importe de beaucoup
s'ar

s'arrester sur la controuerse de ce point, veu que pour cela on n'en doit varier n'y changer la curation; encores que la preservation semble deuoir estre frustratoire, à ceux qui tiennēt ceste opinion, pource qu'il faut qu'une fois en sa vie l'homme se mondifie, par ladicte verolle, de ceste corruption tirée du sang menstruel; voire mesmes, il y'en y a qui ont estimé que ceux, qui n'ōt iamais ladicte verolle durant leur aage i'a aduancé, s'ils viuent iusques à leur derniere vieillesse ou decrepitude, faut qu'ils deuiennēt necessairemēt lepreux cōme le recite ledict Mercurialis au susdict 2. chap. de son liure des maladies des petits enfans. Pourtant l'on se trauaille en vain de fuir ce qui ne se peut eiter en aucune façon, ou feroit que le delay, & retardatiō se puisse dire vne telle quelle preservation, laquelle mesmes chacun de nous tāsche & s'es-

faye de cercher par toute la force de son esprit, & prudence en la mort mesmes, encor qu'il sçache que necessairement il y faille venir tost ou tard, sans qu'il la puisse euter, ny fuir; mais c'est à vray dire qu'on ne se sent en tout tēps disposé, n'y à toute occasiō, saison ou commodité de pouuoit satisfaire à sō souhait à telle necessité qui est cause, qu'on desireroit de la choisir à son gré (si Dieu le vouloit ainsi) & la naturelle & accidentelle disposition le permettoit auxquelles choses neātmoins il faut ceder & obeir par amour ou par force; & les recevoir, avec loüanges & actions de graces à sa prouidence paternelle. lors qu'il luy plaira nous visiter. Nous tenans cepēdant prests & bien disposés pour n'encourir aucun des dangers de la mort pre-miere ou seconde.

Discours sur les trois causes, conioincte, antecedente, & externe, concurrentes en la generation & sortie de ladicte maladie & de sa contagion.

CHAP. IX.

CE fondement posé & assésuré de la cause conioincte de la petite verolle asçauoit l'impression & infection dud; et sang menstruel se cachant & couuant pour vn temps dās les parenchymes principaux de nostre corps, & autres mēbres d'iceluy; il faut tenir aussi pour chose ferme, qu'elle s'esmeut aux premiers, qui commencent de l'auoir par quelques causes externes qui excitent les antecedentes, & celles cy ladicte conioincte. Car la cause procatartique & externe comme sont vents austraux & meridionaux & autres choses non naturelles tendantes à eschauffemens excessifs comme tra-

uaux, & courses, viandes grasses; & douces, grandes veilles, grandes repletions, des viandes espicées, salées & frictes, passions d'esprit eschauffans les humeurs, meuuent & excitent les causes antecedentes desdictes humeurs & ichœurs contenus en la masse sanguinaire cōme estant la cause matérielle interne & immediate de la fièvre continue putride, laquelle apres esmeut la conioincte, qui comme le ferment & leuain de ladicte corruption du sang mēstruel, est la cause sans laquelle ne se peut rien faire ny attéter en ce mal, comme estāt la principale agente, laquelle ioincte avec les internes mediatrices & antecedentes desdictes humeurs & ichœurs putrefiez dans les veines excitent la susditte fièvre continue putride; laquelle dās quelques iours pousse dehors à la peau cōme par Crise & termination lesdictes excretions veroliques, quelquefois

parfaictement & entierement par le mouuement qui est entieremēt critique, & quelquefois nō, par le mouuement purement symptomatique, ainsi qu'il se dira cy apres, au grand dommage & dāger du subiet, quelquesfois si tandrelet, mollet, delicat & debile qu'il ne peut mettre hors cet ennemy interne & capital. Or apres sa contagion se dilate en vagant & infectant ceux qui y sont disposez & ne l'ont eüe en vne mesme maison, Cité, ou pays ou elle tyrannise apres & rempe peu à peu. Et alors elle communique sa malice comme les autres pestes par vne exhalaison ou euaporation maladiue infectant les susdicts sur tout s'ils s'eschauffent le sang & autres humeurs & ichœurs, & s'acquierent quelque semblable fièvre, se terminant par lesdictes pustules, au quart ou cinquiesme iour, tant est la cause antecedente & coniointe meslec
ensem

ensemble par ladicte fieur pleine de vice & corruption; & ladicte infection contagieuse, maligne & dangereuse ausdicts qui sont affligez de ladicte verolle.

De la vraye preservation & methodique de ladicte verolle.

C H A P. X.

Estant ceste maladie si cruelle ausdicts petits enfans & grandelets, ou autres qui ne l'ont eüe, il est bon de les sequester, quoy qu'il s'en puisse ensuiure, qu'ils la puisent auoir ou non, en la saison en laquelle il s'en void grande mortalité: & pourtāt soit qu'ils tettēt, soit qu'ils foyēt seurez, ou dés n'a gueres ou dés long temps, s'ils ne l'ont eüe, on les fera changer d'air en les emmenant ou faisans porter en lieux exempts & esloignez dudit mal, & autres incōmoditez, & s'il y rāpe, & s'y d'escou-

ure, aux lieux non infects, ou aux moins infects, & les faudra tenir resserrez avec leurs nourrices, & ceux, & celles mesmes, qui les frequentent, & assistent de plus prez, tout ainsi qu'on fait en la peste, & autres maladies cõtagiieuses. Et soudain qu'ils y sont changez, il est fort bõ de les y purger, ou au moins leurs nourrices, comme aussi vser de la saignée, sinon esdits enfans trop petits, au moins en icelles, pour leur renouveler & raffraichir le sang & les purger, pour faire le lait meilleur & plus salubre; Apres quoy les faut tenir en regime separāt la nourrice de tout eschauffement avec l'homme, de tout violent exercice, & travail, des viandes, & boissons, qui la peuvent esmouuoir & alterer, de toute repletion extreme, & nauseative, & de toutes passiõs d'esprit, sur tout de cholere, chagrin, & melancholie, folie d'amour, ialousie, dances

dances, & chants lubriques & sēblables qui la peuvent exciter à la chaleur vénériēne. Son nourrisson sera tenu aussi net, & ioyeux, & esloingné de toutes occasions de pleurs, chagrins, trop grāde repletion, de laiēt, & viandes solides, s'il est ja grādelet, comme aussi de fruiets corruptibles cōme sōt figues raisins meurs & melons. Pareillemēt se gardera la nourrice & ledit enfant de saleures, & autres choses piquātes. Ce sont les precautions desquelles faut vser, pour couper broche & occasiō à ladite petite verolle d'aissaillir audit tēps pernicious & dangereux de mort, lesdits petits enfās, attēdāt quelque autre saison, qui pourra estre moins funeste & mortelle par la grace de Dieu, ou l'enfant plus vigoureux pour porter les remedes de la purgation & saignée & autres Alexipharmaques & Antidotes.

Des signes pathonomoniques de la vraie
petite verolle & de la cause de
singulière & s'arrehente.

CHAP. XI.

IL faut à présent traicter des signes
de ladicte maladie: desquels Hip-
pocrates fait mention au liure des
maladies epidemiques ou popula-
res, lors qu'il dict, que ladicte verol-
le consiste en la pluralité des pustu-
les, ou enleueures du cuir, rouges,
rondes ou petites, semblables à varos,
coustumieres de venir vne fois seu-
lement en la vie aux hommes selon
l'opinion & vsage commun: iacoit
qu'à aucuns, qui n'en ont esté entie-
rement purgez puissent estre sorties
d'eux & trois fois, par la vertu & for-
ce de la faculté expultrice; laquelle,
n'est tousiours si forte en tous, qu'el-
le puisse estre suffisante à surmonter
& vaincre totalemēt la cause dudit
mal

mal envne fois & saison, d'ou proce-
de ladicte recheute comme aussi se
voit és autres maladies en aduenir
de mesmes , pour estre demeurée
quelque partie de la cause morbifi-
que apres les Crises imparfaictes. Et
encores que par la continuation du
nouveau adioustement, & assimila-
tiō de l'alimēt les humeurs ne soyēt
tels en nombre pour estre substitués
au lieu & place de leur continuelle
consomption & dissipation , toutes-
fois il demeure en noz mēbres vne
certaine deprauée & vicieuse quali-
té de ce sang menstruel par fois, qu'à
la fin tost ou tard infectant vne par-
tie de noz humeurs apres auoir trop
fasché & molesté nostre nature , elle
s'esleue de nouveau alors de toute
sa force , pour la pousser & chasser
à la peau , & adonc paroissent les-
dictes pustules verolliques, comme
l'escume de la fièvre continue ou
boillonnement desdictes humeurs,

qui s'esmeut par ladicte nouuelle putrefaction, importunant la vertu vitale qui est au cœur par sa mauuaise & pestilēte vapeur à se deffendre & chasser hors du corps à ladicte peau, comme aux faubourgs, ce qui derechef attentoit de molester son dongeō & chasteau royal du cœur: Qu'il faut incontinent alors secourir par Epithemes solides, par potions cordiales & semblables aydes.

Des signes precedents & accompagnans ladicte Maladie. CHAP. XII.

CEs pustules dōc sont les signes & effects ou fruiçts de ceste radicale corruption du sang mēstruel, ou d'une partie d'iceluy pour pure qu'elle soit, se ressētāt tousiours d'une partie proportionnée à icelle en sa substāce, quantité, & qualité, & lieu. D'ou aduient aussi qu'elles paroissēt avec la face rouge, & teincte, qui sōt avec icelles signes pathomoniques, mōstrās ce mal peculiēre
ment

ment & proprement, suyuis apres de signes concomitans & accōpaignās ce mal naturellement. Il y a aussi d'autres signes, qui se prennent de l'action blessée ou changemens des excrements ou affection contre nature, que nous appellōs auacoueurs pour le nous annōcer à tēps deu, & pouruoir à son arriuée, asçauoir la douleur du dos, la demangezon ou prurit du nez, la peur & espouuētement au tēps du sommeil & l'espouuēment ou espoingnemēt, & picqueures par la peau & mēbres internes de tout le corps, vne pesanteur d'icelluy, vne inflammation & larmes des yeux, l'abōdāce d'inquietudes & tressaillemēts, avec opressiō & empeschemēs de la respiratiō & plusieurs, qui le suiuent, cōme raucité de voix, crachemēt de matieres grossieres, esternuemēts baaillemēts, ou estendemēts frequēts de bras ou de jambes, palpitations ou battemēts

de cœur, asperité & sechéresse de la lāgue & bouche, trēblemēt nō seule mēt des pieds, mais de tout le corps, qui faiēt que ledit enfant ne se peut tenir sans estre couché au liēt ou au berceau, avec la fieure continue, qui l'assaut par sa tyrannie accōpagnée de tant de mauuais symptomes & accidēs susdicts comme dangereux fatellites ou soldats, qui souuent pourchassēt la mort pour fin de leur dessain & poursuite à leur subiect.

Des prognostiques diuers des especes de la verolle bien ou mal conduicte.

CHAP. XIII.

QVand au prognostic la petite rouge & vraye verolle qui est la premiere espece de ces boutons, & la seconde espece, qu'auons appellee esclate, sont de douteux iugement : & la sortie est plus mal aisée des larges que des aigues, d'autant que la crassitude de la matiere qui les faiēt ne peut si tost penetrer

la peau qui est en d'aucuns tant espesse seche & serrée qu'avec grand peine elles ont issue, mais demeurēt fouuēt detenuës dans les membres profōds ou cachez sous la peau estāt biēsouuēt cause de mort. Toutesfois si elles sortent biē ou naturellement, ou par l'aide du Medecin, elles sont salutaires & pleines de bōne esperāce: comme aussi la troisieme espece dictē rougeole, à cause de la subtilité & tenuité de son humeur, rarité & mollesse de la peau, en ceux qui l'ōt: & comme elle sort aysément, aussi elle s'esuapore & esuanouit plustost, & est moins dangereuse. Celles qui se couuent & arrestent en la peau, sans s'esleuer, & se faire paroistre apertement, & bien tost, ne sont sans grand peril: comme aussi celles qui naissent vlcerées, avec vne fange ou botie, & matiere virulente puante & tirāt sur le rougeastre, verd, ou noir, comme aussi si elles naissent à cette

heure

heure & peu après se perdent & es-
uanoüissent. Celles aussi qui naissent
fort espesses & drues, profondes &
menues & rouges ou noires, accom-
pagnées de grande fièvre monstrent
que la mort est à la porte. Mais celles
qui sortant rouges, & larges, rares, ou
clair semées, & qui sortent tost, meu-
rissent tost, & contiennent vne ma-
tiere blanche, & suppurée ou meure,
sont plus salubres & moins d'agereu-
ses, monstrés signe de bõne & loüa-
ble crise accompagnée des signes de
coctiõ, comme sur toutes celles qui
au cõmencement sont traitées avec
bon conseil de diette & remèdes or-
donnez par quelque docte & expert
Medecin, & non par Empyriques &
fèmes outrecuidées, leur faisant boi-
re vin & les conduisant à l'extraua-
gante; veu que c'est vn mal de telle
cõditiõ qu'il a besoin d'estre traité
avec bonne methode & procedure
de raison comme se dira cy apres.

*Du regime de l'air & des autres choses qu'il
faut observer en la nourriture de
l'enfant verollé.*

CHAP. XIII.

A Cheué qu'auõs de traicter du
nom de la petite vorolle, de ses
causes vrayes ou approchâtes au pl^r
pres de la verité, des signes qui la de-
uancent, accõpaignent & ensuyuēt,
& du presage & pregnostique d'icel-
le. Il est temps de venir à la curation
& du mal principal, & de ses sympto-
mes & accidents, qui pour la plus-
part la suyuent; comme l'ombre le
corps, & ce selon la methode me-
dicale, & ses scopes & indications.
Pourtant commencerõs par la diet-
te, laquelle ne fera comme celle
qu'auons mis cy dessus parlans de la
preseruacion en plusieurs choses sur-
tout en l'air, qui se choisira chaud
icy (& là froid) pour ayder à l'eruptiõ
&

& propagation desdictes papules, ou bosseties & bourgeonnemens d'icelle. Doncques l'enfant y tombant & commenceant d'auoir les signes susdicts ou tous ou partie d'iceux, fuira l'air froid, qui espeussissant la peau empesche qu'elle ne sorte, sera tenu en son berceau, ou quelq; petit liët, ou és bras de sa mere ou nourrice enuveloppé de langes chauds, & rouges, couuert, & deffendu dudit air froid & venteux & tenu chaud mediocrement, à fin que le trop tenir chaud, ne le face s'yncopiser ou manquer de cœur, se contentant du laiët de sa nourrice, qui soit bon & bië choisi & qualifié comme il faut, s'il est au deffous de douze mois, & alternatiuement, & par fois de quelque boüillon, de chaponneau, veau, cheureau, bon moutton & poulets faiëts avec l'aigrette; la bourrache, l'herbe du soulcy ou laitues ou pourpier, sans luy permet-
tre

tre autres viandes qu'iceux , avec quelque petite tranche de pain , ou quelque pain laué, ou esmyé & graté dans lesdits bouillons, ou hordeas ou auenats faiçts de grains d'orge & auoyne mondez, cuits huiçt ou neuf heures en eau, & passez par l'estamine, & apres meslez avec le bouillon desdites chairs sans sel, mais plustost avec vn peu de sucre: pourra aussi manger quelques pruneaux ou aigriotes ou passés de damas , ou de frötignan sans le grain , cuites dans l'eau, quelques pommes de Cappendu ou de paradys , & autres qui se pourront treuuer selon le temps, vsera aussi d'aigriotes & pruneaux frais , ou grenades si la saison le porte, mais nō de figues n'y raisins frais, ny vieux, hormis les damas lauez & bouillis , ny dattes , ny noix vieilles , ny nouvelles ; pourra vser toutesfois de pignons , amandes , ou auclaines sucrées ou de marcepain

& Escalisōs, racine de Buglosse cō-
fitte, gorge d'ange, coucourdat, Ra-
mage de Gēnes si son aage, ses dēts,
sa volonté, qualité & condition, ou
moyens le portent, & toutes lauées
ou trépees dās l'eau por leur oster la
grand douceur ou chaleur. Aussi sa
mere & nourrice pourra vser lesdi-
tes viandes ordinaires & extraordi-
naires peu de sel, n'y guieres de suc-
cre, pour n'eschauffer trop leur sâg.

*Ascauoir si le laiēt se doit donner à l'en-
fāt avec la sieure, & cōme l'on se doit por-
ter en iceluy & autre nourriture à sō lieu.*

CHAP. XV. DE LA NOURRITURE

ET dautāt que le laiēt n'est gue-
res bon avec la sieure selon l'A-
phorisme d'Hippocrates, l'accoustu-
māce toutesfois d'iceluy le luy per-
met mais qu'il soit bien rectifié, par
le bō regime sur tout & viādes raf-
fraichissātes de la nourrice, n'ē pou-
uāts priuer entieremēt lesdits enfā-
cōs verollez, qui ne peuvent vser de

viandes solides, mais leur en faudra donner beaucoup moins, & cōme és deux, trois, & quatre petits repas de quatre en quatre heures, & entre iceux deux heures apres iceluy, on leur pourra bailler demy escuellée de bouillō ou pain lauē, quelq; peu d'eau cuite, avec la racine de gramē ou chiē-dēt ou d'aigrette, avec quelque cuillier de sirop de limō violat, aceteux, ou jus d'aigriotes, ou quelques tablettes de *manus Christi* perlē, destrēpée avec quelque once d'eau de buglosse distillée au bain marie; ptisane cōmune, ou eau cuite & sucree, gardant qu'il ne face faute en trop grāde repletion, & qu'on ne le charge trop de viādes solides boūillies ou rosties s'il n'est capable d'en manger, ny aussi du boire, luy faudra aussi tenir le ventre lasche avec, quelque cuiller ius de pruneaux & pommes cuites & le garder de pleurer & se chagriner.

*Asçauoir mon si le vin est bon aux enfans
verollez & à leurs nourrices.*

C H A P. XVI.

EN ce lieu il se presente vn grãd
Paradoxe à disputer, & resou-
dre. Asçauoir mon si cōme le laiët se
donne, avec doute à l'enfant feбри-
citant, pour ne contreuenir à l'a-
phorisme d'Hippocrates par lequel
est porté que ledit laiët est contraire
aux febricitans, on doit permettre
le vin (ie ne diray pas aux nourrices
qui en sont assez friandes & conuoit-
teuses) mais à leurs petits nourrissons
qui les ensuyuent souuent elles le
leur ayant accoustumé hors l'affli-
ction de la verolle, ou estans portez
à le desirer, ou naturellement par le
droit d'heritage des peres & meres,
ou par l'inclination d'vn tel mal. En
en ce cas il semble que plusieurs du
vulgaire pourroyent estre excusés
pour auoir esté imbus de ceste opi-
nion

nion, par la coustume des personnes de son rang. Mais qu'il y ait des Medecins, qui se disent doctes docteurs qui le conseillent aux petits enfans de laiçt, celà ne se doit tolerer sans reproche, sur tout quand ils le leur conseillēt mal trempé, veu qu'iceux estans maladifs, ie ne diray pas malades, se debilitent & rendent resous ou paralitiques, si l'õ les en laue par dehors, i'açoit qu'il leur peut seruir, estans sains, pour les corroborer si l'on les en laue, cõme le tesmoigne Cœlius Rhodiginus en ses antiques leçons chap. 1. du liure 18. Aristote en ses politiques liure 7. ne permet qu'on despartisse aucun vin aux nourrices, ny aux enfans: & Auerroes en l'enarration des cantiques d'Auicenne, dit mesmes que les anciens ne permettoyent l'vsage du vin aux ieunes, d'autant que la chaleur de c'est aage est trop vigoureuse, & le mesme Auicenne escript

au chap. 8. de la doctrine seconde en la fentierce, que si vous donnez du vin à l'enfant vous faiçtes autant comme si vous mettez du feu en vne matiere principalement debile & inflammable allumée sur tout de la fieure, d'autant aussi que le corps des petits enfãs est laxé, rare, mollet & chaud estrangement, debile des nerfs, & du cerueau, auxquels il est nuisible: Et Galen au liure que les meurs suyuent le temperamment du corps, dict que les petits enfãs temperez ne le doiuent goustier, moins donc les intemperez qui ont la fieure continue, où il est tres contraire, & ne s'y doit donner comme il est dit, au liure septiesme des facultez des medicamens; & en plusieurs autres lieux du mesme liure, auxquels il donne pluystost liberale-ment l'eau, d'autât que le vin augmente la fieure, & excite plus grande soif, & apporte vn nombre pres-
que

que infiny d'accidens en l'aage de l'enfance, comme se pourroit preu-
uer par plusieurs passages d'ice-
luy & de plusieurs autres aucteurs
anciens & modernes. Parquoy pour
resoudre ce point il ne faut donner
vin aux nourrices que le feu de la
fièvre & accidens plus pregnans ne
soyent passez, ny aux enfans; sinon
tant peu que ce soit, sur la fin, s'il
y a grande debilité ou flux de ven-
tre lienterique produit d'une gran-
de imbecillité de la chaleur natu-
relle, & encores alors avec grandis-
sime considération, quelque vante-
rie que fassent lesdicts Médecins
qui ne sont fondez sur aucune rai-
son ny auctorité que des femmes
ignorantes ou leurs experiences in-
pertinentes.

FIN DV LIVRE

premier.

Livre

L I V R E S E C O N D.

Remonstrances en passant à Messieurs les Medecins pour les inviter à penser plus attentiuement que le populaire à la prouoyance des remedes generaux, pour s'y bien conduire, selon la Theorique.

C H A P I T R E P R E M I E R.



R d'autant que par cy deuant i'ay dit que ie n'escruiuois, qu'au populaire familieremēt, les plus doctes n'ayans besoin de mō conseil; neantmoins il se presente vn poinct, à traiter par methode, sur le gond duquel se tourne l'assurance mesme de la principale guerison de toutes les especes des exanthemes ou exitures & sortie de toutes lesdites taches procedentes de maladies malignes, duquel point la theorique & cognoissance entiere des considerations necessaires mespri

mesprisee, ils s'esyuroit beaucoup d'inconueniens hazards & perils des malades affligés d'icelles; Et iacoit que la deduction d'iceluy soit vn peu longue, & mal aysee à desveloper, si nō au plus doctes, au moins à ceux qui ou par faute des disputes scholastiques, ou par faute, & manquement des Aucteurs, qui traictent exactement ceste matiere, si est-ce qu'il ne m'y faut oblier rien du deuoir, pour n'estre cause des malheurs, qui s'en pourroient ensuiure; Et pource faut que ledit populaire y pense bien auant que s'ayder des remedes generaux de la saignee, purgation & prouocation des sueurs, & semblables remedes d'importance, & prenne conseil bien à propos des Docteurs parlants & viuans, & non-seulement des muets qui sont les liures desquels à leur deffaut s'aydera au besoin en les considerent de prés, & syuât de poinct en poinct

50 *Le chasse-verolle*
& bien meurémēt & non à la volée.

*Des diuerses opiniōs d'ayder ou empescher
la sortie des diuerses especes
d'Exanthemes.*

C H A P. II.

DOnques il faut sçauoir, que la nature en ces fieures malignes se voulant descharger à la peau par lesdictes taches grandes cōme celles de la petite verolle & especes d'icelle, ou petites comme est le morbille, Tac, pourpre ou petechies en Italien, ressemblants à picqueure de pulces: Il faut que le sage Medecin, ou autre à son deffaut qui conduira ce faict pēse à ce qu'il a affaire pour ce que on y a douté souuentefois à cause des diuerses opinions, qui se treuent parmy les doctes comme se verra cy apres Car il y en y a qui tiennent, qu'il faut ayder ce mouuemēt de la Nature en quelque temps qu'il vienne, & en quelque façō, que
cc

ce soit, s'aydant du conseil d'Hippocrates, par lequel nous sommes aduisez, qu'il faut tirer & amener les matieres, la où la nature tend, & les emmaine, par regions & lieux & passages conuenables, cōme en ce faict en telles excretiōs la peau est la tresconuenable voye, & passage Ce qui se confirme, par vn autre Aphorisme dudit autheur, qu'il est bon que l'Erisipele se change des parties internes, aux externes, & que cela estāt, il est beaucoup meilleur de ce faire, en ces fieures malignes & veneneuses, & qu'il faut ayder mesmes à faire sortir & tirer en la peau les taches ou tac, qui apparroit en icelles. Aucuns sont d'opinion aussi que ceste excretion & apparences de ces taches rouges ayant accoustumé de se faire symptomatiquement, ou critiquement, tiennēt que celle qui se faict par crise ou iugement doit estre aydée: Mais qu'il

faut arrester & empescher celle qui se faiet par symptome & accident. Car la premiere se faiet quand la matiere qui faiet le mal est cuicte & domptée par le pepasme, ou coction faiete par la Nature: Et pourtant se doit ayder à sortir, & estre destournée en dehors. Mais les autres paroissant, la matiere estant crüe, on ne les doit irriter. Ains les laisser, & mesmes empescher.

Accord des opinions contraires sur l'ayde ou empeschemēt de la sortie des Exanthemes, & taches ou macules de la peau, & du mouuement Critique symptomatique & mitoyen de la Nature.

C H A P. III.

OR pour accorder les susdictes opinions contraires, il les faut desmesler comme s'ensuit. Les mouuemens de la nature en l'excretion,
ou

ou repouſſement des matieres en dehors ſont de trois ſortes, les vns ſont purement critiques, les autres purement ſymptomatiques, & les autres mitoyens, ou mis entre ces deux. Les premiers aſçauoir puremēt critiques, ſont ceux, qui ſōt precedens & deuancez des ſignes de la coction, & ſe font aux iours decretoires comme ſont le 3. 5. 9. 11. 17. & ſemblables iours impairs, & iceux ſuruenans en ces iours là apportent allegement de la maladie & tolerance & ſoulagemēt au malade. Or ces mouuemens critiqués ſont parfaicts ou imparfaicts, les parfaicts ſont ceux auſquels toute la matiere peccante eſt miſe & chaffée dehors. Les imparfaicts quand toute la matiere n'eſt pas forcloſe & ſortie du tout, ains ſeulement vne partie. Ce qui procede de deux cauſes. L'vne eſt que combien que toute ladicte matiere peccante ſoit cuiſte, toutesfois

ou pour sa multitude, & abondance
ou pour l'imbecillité & foiblesse de
la nature elle n'a peu estre mise tou-
te dehors. Les mouuemens pure-
ment symptomatiques, sont ceux,
qui se font, ou quand la matiere est
encores crüe, ou de toutes parts ve-
neneuse & mauuaise, & poussée hors
aux iours pairs & non decretoires,
& avec grand trauail du malade, säs
aucun allegement, ou bien petit, ad-
uenant au malade. Les mouuemens
mitoyës sont ceux qui se font quäd
la matiere est aucunement cuiëte, &
demeurant la coëtion imparfaicte,
nature donne l'assaut à ladiëte ma-
tiere, & ne la pousse pas entieremët
dehors, d'ou aduient que la santé
ne s'en ensuit pas parfaicte, i'açoit
qu'il s'en ensuiue quelque allege-
ment au malade, & quelque bon in-
dice & signe par fois d'vne bonne
santé à l'aduenir.

En quel mouuement des trois on doit & peut ayder l'exiture ou arrest des exanthemes, ou taches de la peau.

C H A P. I V.

CES choses demeurant ainsi ie dis & propose que ces macules ou taches rouges, qu'on appelle verolle, ou ses especes, ou morbilles, Tac ou petechies apparoiſſantes là, ou le mouuement purement critique se treuve, & est parfaict, ou purement symptomatique, il ne doit estre aidé en aucune façon par aucun artifice. Car s'il faut parler en premier lieu du critique parfaict, toutes & quantesfois que la nature critiquera ou iugera la maladie & la terminera purement & entierement & parfaictement, le Medecin ne doit rien bouger, mouuoir ou entreprendre de nouveau. Mais doit laisser la chose telle quelle est, remet-

tant le tout à la nature bien faifante, s'arrestant tant seulement à la curation de la fieure; Or tout ainsi comme en ce mouuement critique, ainsi aussi au purement symptomatique, il ne faut, que le Medecin, s'employe à rien faire pour attirer la matiere peccante des parties internes aux externes. Car veu qu'il est comme vn artisan ou ouurier destiné pour seruir à la nature, il faut qu'il l'aide, lors qu'elle s'emploie à bien & non à mal faire. Or elle trauaille mal, quand la matiere estant crüe elle tasche & s'effaye de la pousser dehors, n'estant alors encore cuitte ny preparée; mais crüe. Auquel téps s'il se pousse & purge quelque chose en dehors, il ne se purge ou sort pour la raison de la nature bien ouurante, mais toutes telles excretiōs, sont symptomes, cas suruenans & accidens outre la nature de ces dispositions, qui sont au corps. Et adōc quand

quand la nature est greuée, & chargée ou irritée des causes faisantes les maladies, & qu'il y a crudité d'humeurs, il est impossible qu'il se face aucune bonne euacuation.

*Conclusion du discours des trois mouuemens
de la nature & l'explicatiō de certains
Aphorismes d'Hippo. touchant
lesdicts mouuemens.*

C H A P. V.

ET de là aduient que là iaunisse ou maladie Royale est estimée mauuaise, si elle aduient auant le septiesme iour. De là aussi se void aduenir que le flux de ventre procedât de l'atrebile ou noire cholere, au commencement de la dissenterie est accident mortel: cōme sont aussi semblables autres aduenemens, qui ne sont contraires pourtant aux autres deux lieux d'Hippocrates, qui sont

apportez & deduiçts au contraire; d'autant que lors qu'il disoit il faut emmener & tirer vers la part, où nature tend si c'est par regiõs, lieux & passages conuenables, il parloit de la matiere cuiçte, laquelle ou elle ne se iugera pas, ny terminera, ou n'estoit pas entierement iugée, & terminée; Et lors qu'il disoit, qu'il est bon que l'erisipele se change & tourne des parties internes aux externes, il parloit du total changement, de la maladie, qui est non seulement vn bon signe; mais mesmes la cause d'iceluy bon signe, & ne parloit pas de l'excretion de la matiere de quelque partie tentée ou attaquée par la nature lors qu'elle est irritée ou par l'abondance, & charge de quelque humeur, ou par quelque mauuaise qualité d'iceluy. Pourtant alors le Medecin doit desister & s'abstenir de tout traual, & effort, qui pourroit ayder vn tel mouuement. Toutesfois
il

il faut qu'il aduise de toutes parts les choses, qui sont contenuës au corps outre la nature, & qu'il considere en quel estat est la miniere & fondriere, qui cause ces macules, & taches. Car si c'est vne plethiore & plenitude de sang, il la faut oster, par le moyen, qu'auons dict cy dessus, qu'il se deuoit faire, par l'ouuerture de la veine, & il ny aura aucun danger par ladicte saignée, que la matiere qui est inherente, & comme fichée & attachée au cuir & petite peau, se retire au centre & dedās du Corps, d'autāt que cest amoindrissement de sang faict par la saignée ne peut pas retarder ou estre retirée en arriere & en dedāns dudit centre, ou profond du Corps, & des parties nobles; ou celles qui leur seruēt prochainement, comme le polmon au Cœur & la ratelle au foye. Mais plustost nature estant soulagée par ladicte saignée; & faitté plus forte,

par dessus le demeurât, pourra (peut
estre par vne plus asseurée voye)
s'employer à le cuire & pousser de-
hors.

*De la difference de l'utilité qui est d'ouurir
les veines des bras ou iambes au com-
mencement ou après la sortie des exan-
themes ou taches.*

C H A P. VI.

OR d'autant qu'en tel cas il y en
y a qui sont trop audacieux
d'ouurir les veines superieures &
internes des bras tant dextres que
senestres: il faut qu'ils croient qu'ils
attendent vn affaire plein de danger
& hazard. Car les fieures esquelles
ces taches ou macules & exitures
rouges apparoiſſent sont du nombre
de celles, qui renuersent les forces;
& ladicte saignée, desdites grandes
veines, & parties superieures en ceste
maniere de fieures les abbat aussi
fort

fort: Parquoy, il la faut laisser, & faire celle, que pretendons dire & cy apres conseiller des parties basses la preferant à tout autre.

*De la purgation en quel temps, & commēt
elle se doit faire bien à propos
& vtilement.*

C H A P. VII.

SUr ce faict il se presente vne autre belle question & controuer-
se asçauoir si en ce cas de l'apparen-
ce desdites taches rouges on doit
donner aucun medicament purga-
tif. A cela se peut respondre comme
il appert, par ce qui est declaré cy
dessus, que la matiere crüe ne doit
estre aucunement euacuée ou tirée,
ie ne diray pas par aucun medica-
ment purgatif; Mais mesmes ne doit
aucunemēt estre attaqué, ny assail-
lie, par aucun medicament, ou vio-
lant

lent remede, prouocāt par force les sueurs ou vrines. Neantmoins il faut prendre garde que si en ce cas il y a quelque signalée impureté, & manifeste corruption ou putrefaction accompagnée des signes de la vermine es visceres, entrailles ou boyaux, & autres voyes communes par lesquelles la maladie interne se puisse entretenir à cause de ladicte pourriture & corruption. Il la faudra purger par medicamens conuenables, pour exterminer & chasser hors lesdictes mauuaises humeurs & leur sequele. Mais il faut, que ledit medicamēt soit du nombre des benins & lenitifs sans les auoir au prealable preparez, par sirops, ou decoctions ou autres qui ont vertu de s'opposer à la qualité deprauee & maligne d'iceux, lors qu'on doute de la verolle petite & de ses especes, ou taches suiuanes, les fieures malignes, estant en cours & saison, &

appa

apparoiffante, incontinent au commencement, comme eftant puremēt ſymptomatiques Mais apres ledict minoratif & leger medicament on commēcera à pourſuyure les ſyrops & decoctions & potions cordiales & bezoardiques, pour ayder à cuire preparer & dōpter le reſte des mauuiſes & corrompues humeurs. Que ſi leſdictes voyes ſe treuuent & cognoiſſent nettes deſdictes mauuiſes humeurs & vermine, comme en ceux qui ſont tenus purgez, & bien nourris, pour n'amaſſer mauuiſes humeurs, ny aucune ſorte de vermine & corruption, lors toute ſorte de medicament ſe doit abhorrer, & deſteſter, ſur tout trop motif & violent, pource que la matiere crüe ſ'eſmeut & trouble les veines par iceluy, pluſtoſt qu'elle ne ſ'amadoüe, & dompte, & au lieu de celà le Medecin doit inſiſter ſur ladiete coction & alteration ou changement des quali-

tes d'Icelles, par lesdicts syrops, decoctions, & antidots conuenables, cōme dict est cy dessus: Et pour l'esgard du doute du dāger, n'abādonner iamais la suyte de la droicte methode medicinale, & se garder bien comme d'un poison de ne repousser iamais ces matieres du cuir & peau par medicaments qui ont vertu de repousser en dedans, (comme quelques personages, autrement celebres & renommez pour fort sçauāts conseillent, & iugent, qu'il le faut faire ainsi, fondez & guidez par la sentence d'Hippocrates, disant, qu'il faut arrester les choses qui s'aduancent inutilement,) tant pource que lesdicts medicamens, reprimās arrestās ou repoussans ne sont point receux. ny aduotiez en matieres veneneuses, que pource aussi que les symptomes ou accidēs ne se doiuent curer, s'ils ne subissent & portent le nō de la cause mesmes de la maladie.

Qu'est

*Qu'est ce qu'il faut faire au mouuement
purement critique en l'apparoissance
& expulsion des taches.*

C H A P. VIII.

MAis s'il aduient que le mou-
uement, desdictes taches en
dehors soit purement critique, &
toutesfois imparfaict (asçauoir ve-
nu apres la coctiõ, paroissant és vri-
nes, és iours de crise, & impairs, cõ-
me. 3. 5. 7. 9. 11. 14. & 17. Il le faut
lors aider par tout moyen & artifice
ingenieux. Car l'art porte avec la
raison, qu'ayant vñe auparauant les
choses vniuerselles on peut attirer
en dehors les choses que la nature
n'a peu pousser entieremēt, ou estāt
abbatue par sa propre debilité ou
accablée par la multitude & abon-
dance de ladicte matiere. Ce qui se
peut faire par double voye, par la
premiere en attirant du dedans en
de

dehors à la peau, & par la seconde en relaschant, & ouurât ladicte peau. La premiere intencion s'accomplira par l'application des ventouses seches & sans scarification & decoupeures, ou par icelles decoupées grandes ou petites, & faudra scarifier les principales & plusieurs, (s'il y en y a) grandes taches, la matiere s'y treuvant abondante, & lefdites taches estans non des moindres, mais des grandes, d'autant que celles cy s'engendrent de matiere plus copieuse & plus visqueuse, & pourtant elles ont besoin de plus grande euacuation, n'oubliant d'appliquer les grandes ventouses en premier lieu sur les parties de l'os sacré, & des muscles des fesses internes & externes. Et apres les petites, sur lefdites parties garnies, & couuertes desdites taches, pour faire premierement la réuulsion; Et apres l'euacuation de toutes lefdites ventouses,

ses, selon le iugement du Medecin present, qui ayant esgard aux circōstances de l'aage, temps, force, & autres, s'y comportera selon icelles. Quant à l'autre seconde voye, pour attirer de dedans en dehors lesdites taches & matieres veneneuses, qui nous sont notées par icelles, nous l'ayderons & exequuterons nostre deuoir en gardant le malade de l'air froid, l'environnant de peur que la-dicte matiere ne r'entre, & se retire en dedans. Ce qui feroit vn mauuais signe, & alors nous l'enueloperons de draps rouges, & autres semblables pour le tenir chaud, & luy ferōs des frictions aspres & bonnes, avec linges chauds, ou la main oincte de quelque huyle relaxant & de tēperamēt chaud comme est le Chame-melin & anethin de liz, & semblables. Et si la necessité le requiert on meslera avec iceux, vn peu de nitre & de vin pour penetrer dauantage,

& ouvrir les porosittez du cuir.

Conseil & remedes pour combattre les taches malignes & mortelles de soy. Et de la vertu des Cantharides entre autres attractifs de la cause veneneuse.

C H A P. IX.

QVe si ces choses ne suffissent, & ledict tac ou taches estoient plus malignes, comme sont les violettes, & plombines, vertes, ou noires, il faut venir mesmes aux vesicatoires & Medicaments viceratifs & autres plus attractifs, mis & posez sur le bras de bras, & des iambes, & pres des emunctoires des parties nobles. Car par iceux nous pourrons attirer ces ichœurs, & humeurs maligns aux parties externes, & extremes, & les vuyder par icelles, en les retirant desdites parties nobles, aux ignobles peu à peu & cōsequutiue-
ment, en aydant le mouuement de
la

la Nature qui les pousse du dedans d'icelles en dehors en la partie de la peau. A cest vsage seruent merueilleusement les Cantharides, la graine de moustarde, la racine de Ranuncule Tubereuse appelée piepou à Paris, la racine d'Anemoné, les fucilles d'Iberis, avec ses racines pilées & appliquées sur lesdictes parties, la racine de l'ail, appelé Canin, & les fucilles de Flammula iouis appelée l'herbe aux gueux ou coquins, & l'escorce du dedans du sureau. Mais le principal attractif est la poudre desdictes Cantharides, fort employee pour ces fins, (comme sauons experimentée en vn tres-grand nombre de malades de la fièvre pestilente, qui tyrannisa le Contat Venaissin, (sur tout en Auignon & Carpentras & autres lieux dépendant d'iceux en l'année 1580. où seruis de Medecin de la santé) meslée à la quantité qu'on aduifera, comme
de

de 2. 3. 4. ou 5. & 6. drachmes, meslees avec autāt de leuain, & paistrie ensemble, avec vn peu de vinaigre, y adioustant pour contrepoison la troyfiesme, ou quatriefme partie de graine de semence d'Ammeos; qui rabbat le venin desdictes Cantharides. Et par vne proprieté naturelle; la malice d'icelles, à fin qu'elle ne nuyse à la vescie & excite ardeur d'vrine, tant pource qu'elles ont vne vertu bezoardique & aduersaire audict tac, que pource aussi qu'elles excitēt, avec moindre douleur les pustules & vescietes, par lesquelles, s'attire la venenosité dudit tac, & mesmes des bosses & tumeurs pestilentes & des carboncles mesmes, si l'on les applique trois ou quatre doigts au dessous des emūctoires, ou autres lieux où lesdictes tumeurs naissent & forrent, asçauoir sous les glandes du col, des aisselles & des aygnes. Laquelle ardeur d'vrine ou chaude-pisse

piſſe qu'elles ont accouſtumé d'ex-
citer ſera auſſi preuenue ſi on oinct
les reins & entreſeſſons, & au deſſus
du ventre prez du penil d'un peu de
cerot Santalin, meſlé avec l'onguēt
Roſat de Meſue pour deſſendre la-
dicte veſcie dudiēt ſymptome & ac-
cident, qui ſeroit tres-ſaſcheux &
mauuais en ces fieures malignes, ef-
quelles il faut adoucir & non aſprir,
& irriter des douleurs, ny aucune
autre choſe deſplaiſante & contrai-
re à la nature, ladicte ardeur d'vri-
ne ſuruenante ſept ou huit onces
de laiēt fraiſchement tiré des mam-
melles meſlé avec ſuccre & eau roſe
& prins tiede y eſt vn ſouuerain re-
mede, ſ'il n'y a fieure, & ſi elle y eſt
le meſque ou petit laiēt, ou eau du
laiēt, ſe pourra donner eſtant clari-
fié à la quantité d'une liure avec
deux onces de ſyrop violat.

*Comme se doit conduire le Medecin lors
que la nature n'a entierement terminé
& poussé hors les matieres
malignes détachées.*

CHAP. X.

MAis cependant qu'on administre ces choses, il faut que le Medecin recherche les causes pour lesquelles la Nature n'a entierement critiqué ou bien iugé & terminé : si c'est à cause de l'abondance de la matiere peccante, il s'arrestera plus ausdictes euacuations, ou en les reïterant ou faisant derechef, ou en procurant plus fort, selon que les forces & estat de la maladie le monstrera. Que si cela aduient à cause de la foiblesse de la Nature s'attendant sur les forces, sera bon qu'il pense à les augmenter en administrant par dedans les choses qui la peuuent aider, & esmouuoir sa debilité, ou pa-
cellir

resse, pour pousser du dedans au dehors en la peau ces dictes matieres. Or telles choses sont les decoctions de lentilles, racines de persil, de fenouil, d'ache, semence desdictes herbes, figues, paces, ou semblables cōme se dira cy apres, dans lesquelles on meslera les simples ou composez qui resistent au venin, comme quelques grains de bezoard, de corne de Cerf, racines de Tormentille, feuilles de scordium, conf. Alkermes, de hyacinthe, poudre de l'Electuaire de diamargariton, perles preparées, Coral, Chrystal preparé, bol de leuant, terre sigillee, le tout preparé. Il ne faut aussi pour les remedes cordiaux externes s'abstenir des epithemes & semblables, comme petits animaux tuéz fendus & appliquez chaudement sur-poudrez de poudres cordiales sur le cœur, qui aidēt (contre l'opinion d'aucū) la Nature par leur applicatiō fortifiée à pouf-

fer hors plus promptement la matiere vitieuse en ladicte peau, prenant garde qu'on ne mette choses adstringentes, & repercussives en dedans, parmy lesdicts remedes & qu'on ne les applique aussi actuellement froids ny humides, ains chauds secs, ou solides.

*Qu'est-ce qu'il faut faire au mouvement
mitoyen entre le critique &
symptomatique.*

C H A P. XI.

QVo si lesdictes taches ou macules apparoissent, ny purement critiquement, ny purement symptomatiquement. Ains que leur mouvement soit moyé ou mitoyé entre ces deux, d'autant qu'en cestuy-cy peuvent suruenir choses cōtraires & diuerses (car par fois il peut apparoir ensemble des choses bōnes, par fois d'autres mauuaises, aucunes qui ap-
por

portēt espoir de salut, autres qui l'ostent) alors le Medecin accord & diligēt cōsiderera de toutes parts, toutes les choses qui s'ensuyuent audit mouuement, deuant qu'il mette la main à traiter le malade, d'autant q̄ s'il y a plus de choses bōnes qui s'ensuiuent, que de mauuaises, & que les bonnes soyent de plus grande efficace, & que les signes de la coction soyent plus puissāns, & plus valla- blēs, que ceux de la crudité, dont il espere que l'aide sera plus grande que la nuisance, il faudra aider le mouuement en aidant la Nature en tant que faire se pourra, avec les remedes proposez cy dessus. Et pre- cederā autrement si le contraire sur- uenoit. Car s'il cognoit que les si- gnes de crudité surabondent, & sur- passent ceux de la coction, & plu- sieurs maux suivans, après l'expulsiō comme la langueur, & petitesse des forces, par l'atrouchement du pouls

du malade & la mauuaise tolerence d'iceluy, par ses anxietez & inquietudes, & semblables autres, & ces choses soyent de plus grand poix, & efficace que les bonnes, cognoissant dis-ie toutes ces choses susdictes, s'il est aprez douteux de l'aide qu'il pourroit porter, adonc il s'abstiendra de toute l'aide, qui pourroit aduan- cer l'expulsion en dehors de ceste matiere virulente: & en ce cas sem- blablement se portera & conduira comme si ce mouuement estoit purement symptomatique, se gar- dant neantmoins d'vser d'aucunes choses, qui la pourroyent faire r'en- trer & repousser en dedans; & s'ar- mera tousiours ledict Medecin du prognostic douteux, qui porte que l'esperance en est incertaine, la crain- te asseurée. Dõques iusques icy soit discouru assez au long desdictes ta- ches comme estant vne doctrine fort obscure & enuelopée de beau-
coup

coup de difficultez , & singuliere-
ment necessaire à la bonne condui-
te de ceste matiere, si l'on ne veut
hasarder son honneur & la vie du
malade incontinent au commence-
ment en ordonnât mal à propos les
medicamens generaux.

*Qu'il faut proceder es excretiōs des sueurs,
vrines, flux de ventre, par mesmes con-
siderations qu'aux Exanthemes. tou-
chant les mouuemens de la Nature.*

C H A P. XII.

AV reste tout ainsi comme la
Nature en ceste fieure s'esfor-
ce de chasser , & pousser en la peau
vne partie de ces matieres peccan-
tes, & veneneuses par ces Exanthe-
mes, morbilles, ou macules, &c.
Aussi s'esforce-elle par fois, de s'en
descharger par les sueurs & par les
vrines, & quelquesfois, par le flux
de ventre de diuerses especes , &

quelquefois par abscés & apostemes, tant petits que grands, où suruénas aux ioinctures & autres parties. En toutes lesquelles sortes & manieres d'Exanthemes, il faudra proceder par mesmes considerations, qu'auōs cy dessus remarqué se deuoir faire esdictes taches. C'est asçauoir qu'il ne faudra aider iamais les mouuemens de la Nature purement symptomatiques, ny les critiques parfaicts, maistant seulement les imparfaicts & les mitoyens d'entre iceux.

Des nodes ou tumeurs dures & de leur conduite particuliere.

C H A P. XIII.

ET quand aux nodes, abscés, erysipeles & pustales carbonculeuses, qui se voyent souvent accompagner, & suivre ladicte maladie, ce

qui

qui s'est peu voir és chapitres precedens de la theorique & methode generale, se mettra en pratique particuliere esdictes exitures, ainsi qu'il s'enfuiura cy apres incontinent. Car lesdicts nodes seront aidés à sortir & à supputer (en se gardant bien d'y vser d'aucuns medicamens repercussifs) par l'onguēt basilicon laué, avec eau tiede, en la quantité d'une once en y adioustât vn moyeu d'œuf sans le germe, demie once farine folle ou de moulin, ou autre la plus subtile, meilleure, & de bon bled, passée par le tamis de foye, deux cuilliers d'argent huile de lys & le poix de demi escu de saffran bien seché & pilé, continuant l'application dudit oignement avec estoupes molles, ou linges mollets couverts dudit oignement chauffé, à chascune fois qu'il le mettra dessus & estant bien suppurés par ledict oignement les faudra ouvrir avec la

lancette, & amener par le mondificatif de Resine a parfaicte mondification, & en fin incarner & aider à refaire avec la Nature le degastement de la chair où il sera besoin de l'aureum ou autres ayans telle vertu, pour les cicatrifer aprez avec le desiccatif rouge ou onguët blanc camphré ou seuls ou meslez ensemble, & finalement avec l'emplastre de ceruse ou le di:palma dissous avec huile rosat, & ne faudra d'y appliquer Alum brulé, ou poudre de Mercure s'il y suruient chair baveuse ou superflue, ou bords endurcis à l'entour: & faudra si bien gouverner les premiers qui s'y verront qu'il n'en suruienne & renaisse point d'autres, ou de grands absces mesme à faute d'auoir bien conduit & médicamenté les premiers, qui s'ouuriront avec vne poincte de lancette, s'ils sont grossets & mollets & bien suppurez, y mettant ten-
tes

tes ointes d'onguens cōuenables à l'intention.

Des grands abscez. CHAP. XIV.

A Vtāt fera on des abscez, ausq̃ls on n'vsera aussi de repercussifs lors qu'ils viēdront, ains d'attractifs en dehors, non pour tascher à les refoudre, ains pour les faire venir en auant par loüable suppuration procurée par le remede susdict, ou s'il n'est bastant, apres trois ou quatre iours, qu'on l'aura continué, faudra venir aux cataplasmes ou remollitifs & suppuratifs & maturatifs ou resolutifs conuenables, avec conseil du Medecin ou Chirurgien; & les ouurir en temps deu, ou avec le caustique bon, ou par le bout de la lancette ou bistorie, sans laisser guieres couuër, ny seiourner la matiere dedans, de peur de plus grande cor-

ruption & deperdition de la substance des veines, arteres, nerfs & tendons, d'ou aduiennent aucunes fois des scirrhes, gangrenes, ou sphacelles, ou finiositez & fistules profondes & longues à guerir, amenans paralyties ou claudications, corruptions & degastemens des mouuemens naturels, comme auons veu suyure à plusieurs. *quoniam non est in rebus nisi in rebus*

Des Erysipelles & Tac clauelé.

C H A P. XV.

ET quant aux Erysipeles il les faudra amadoüer, avec l'onguent rosat seul, ou meslé avec le *nutritum cum succis*, ou blanc camphoré; pour n'vser d'autres plus forts refrigerans & ny repercutifs contre la methode mise cy dessus. Ains plustost les faut scarifier superficiellement s'ils sont trop enflammez,

mez, les ayant auparauant bassiné avec eau tiède, & s'ils sont aux cuisses ou iambes il faut reueller & tirer en bas le sang subtil, qui les excite par la saignée des veines du jarret & de la cheuille du pied en dedans, s'ils sont en dedans d'icelles, ou de dehors s'ils paroissent hors: si les forces, patience & aage des malades s'y accommodent. Le mesme se pratiquera aux pustules carbonculeuses, & tac clauellé, outre ce qu'il les faudra scarifier à l'entour plus profondement & plus dru, & y mettre petits cornets & ventouses, après les grandes reuulsives, & applicatiōs des cantharides, pour attirer le sang ou humeur vicieux ou veneneux qui les induict. Et apres y continuer la curation des Carbonecles, avec onguens, caustiques, boutons de feu, & autres remedes expediens & necessaires.

Fin du second Liure.

LIVRE TROISIEME

*Asçavoir-mon si la saignée peut estre faicte
aux enfans d'un, de deux, de trois ans
& comme il s'y faut comporter.*

CHAPITRE PREMIER.



OMME on a pourueu cy dessus à la preservation dudit mal, cōme aussi au regime dudit enfant & nourrice le mieux qu'il s'est peu, pour regard du subiect. Il sera tēps de pouruoir apres aux remedes principaux de la saignée, & purgation, & autres necessaires pour defraciner & combattre ses causes; & pour fondement de ce dessein, principalement à la saignée. Car la purgation lenitiue n'est mise autrement en controuersse, la plus grand part l'aduouiant & receuant en tout aage de l'enfant.

Ainsi

Ainsi qu'il s'est deduiet & defini au chap. 7. du liure second , traictant d'icelle, il faut mettre en auât, quelle y est necessaire & faisable s'ils sont biẽ habituez & selon leur aage se portẽt biẽ, sont charneux & gras-fets , comme aussi l'homme vieil robuste & ferme , & la femme enceinte puissante & gaillarde, pourueu qu'ils soient tous bien nourris si la necessitẽ de la fieure continue ou quelque maladie aigue & maligne le requiert, selon les authoritez de Cornelius Celsus doctissime auteur ancien, & des principaux modernes, comme entre autres de Frãciscus Valeriola en ses enarrations medicinalles , & d'Horatius Augenius en sa grãd'œuure de sa methode curatoire des maladies par la mission & tirement de sang , & autres grands personnages en science & experience , d'autant que comme ils disent , entre autres belles raisons

fons, on ne regarde pas tant au nōbre des années & à l'aage petit ou grand, comme à la fermeté ou grandeur de la force, compassée à la quantité du peu de sang qu'on tire, & à la necessité requerant ce remede, & à l'vtilité qui s'en espere, sans aucun hazard. Car ces subiects pour petits ou decrepites qu'il soiēt, & les femmes enceintes mesmes, naurez ou blessez ou patissans quelque solutiō de continuité par quelque playe ou ouuerture en leurs membres ou saignée du nez ou d'ailleurs excessiue, perdent bien quelquesfois les demies liures de sang, mesmes les liures entieres & plusieurs en nombre sans encourir danger de mort pour cela, ny mesmes aucun manquement de cœur, ou autre accidēt pour ne se pouuoir arrester par aucun art si tost qu'on voudroit, & que la nature ne soit d'eschargee de ce qui est esmeu, & quasi comme su-
per

perflu : mais en ces saignées procurées, & faictes avec conseil & prudence pour le bien des enfans & autres susdicts l'on considere la portée de leurs forces en tenant le dedans des doigts au poulse de l'artere pour le recognoistre & voir s'ils peuvent porter ladicte saignée de quelques onces seulemēt. Parquoy on la peut entreprendre & faire ausdicts petits enfans en l'aage d'environ vn an, deux ans & demy, de trois ans, & aux aages suiuians encores mieux, en petite quantité, avec reiteration, seurement, & sans aucun danger ou hazard, ains au grand profit & soulagement desdicts subiects affligez, ausquels on desire sauuer la vie, moyennant que le tout soit conduit par quelque bon & suffisant Medecin.

Confirmation de la saignée des petits enfans, par raison, authorité, & experience des doctes Medecins, & de l'abus des ventouses sur le dos.

CHAP. II.

LAdicte resolution bien arrestee qu'on peut seurement tirer du sang aux petits enfans par l'ouverture des veines, ne fera impertinent de reprendre en ce lieu l'indiscretion & mauuaise procedure de quelques Medecins & Chirurgiens de nostre temps & pais, qui remonstrez & enseignez par les susdits Docteurs & autres suffisans, ne se gardent, incontinent qu'ils sont apellez & arriuez à la curation desdicts enfans verrollez, d'appliquer sur les espaules & doz d'iceux, deux ou plusieurs ventouses, avec decoupeures, ne faisant conte de ladicte saignée, avant la sortie desdictes pustules, la fieure
pre

presente avec les signes qui la denoncent, ny de la scarification des iambes pour distraire la malignité & venenosité des parties nobles hors du tronc du corps aux brâches d'iceluy. Car si nous conserons & contrepesons ladiète scarification des jâbes avec celles des espauls & doz, nous cognoistrons qu'il y a grâde difference du proffit & soulagement qu'en reçoit le pauvre malade, pource que celle qui se faiët des parties hautes n'a que bien peu de force & efficace pour faire reuulsion des parties nobles, & merite plustost le nom de deriuation qui se faiët és parties prochaines, que de reuulsiõ qui se faiët aux parties esloignées des parties nobles, & à vray dire la scarification qui se faiët és iambes tire ou peut tirer plus grande quantité de sang, d'autât que aux iambes y a de plus grandes veines externes & plus en abondance qu'aux super-
ficiës

ficies & peaux des espaules ny du dos. Et pour la troisieme raison l'operation de la scarification ou decoupeure susdicté faicte aux iambes est beaucoup plus seure & moins dangereuse, que celle qui se fait aux parties hautes, d'autant que quand nous les decoupons, & pour la douleur & pour la situation & posture d'icelles on tire le sang en haut qui de son propre mouuement flue & descend en bas, où estant retiré il n'apporte aucun danger, d'infecter aucunes parties nobles passant par icelles, ou aupres d'elles. Mais en la scarification, qui se faict au dos, il y a danger qu'il ne se face plus grande attraction de sang esdictes parties. Lequel sang malin & veneneux s'arrestant là, fait que le mal afflige plus les parties nobles du foye, du cœur & autres prochaines. Et d'ailleurs au lieu desdictes scarifications, l'occasion & temps se perd de faire l'ouverture

uerture d'une veine, pour dōner ex-
halaizon & empescher l'extinction
de la chaleur naturelle, combattue
par la grande chaleur febrile & con-
tre nature, tellement, que peu apres
par experience on en void ensuiure
le tac noir & mortel sur le gosier &
en la poitrine. Ce qui se peut con-
clurre par ce syllogisme demonstra-
tif suiuant.

Il est tousiours expedient de re-
ueller distraire & tirer par force &
bien loing des parties nobles aux
moins nobles les matieres malignes.

Or ceste malignité se tire du cœur,
partie noble, affligé d'icelle, lors qu'e
une fièvre pestilente & contagieuse
on decoupe les jambes, ou l'on sai-
gne des veines du jarret ou cheuil-
les internes pour faire la reuulsion
d'iceluy en celles icy.

Doncques pour bien faire ladiete
reuulsion faut plustost saigner desdi-
ctes veines, & decouper les jambes

ou greues d'icelles, que non pas les espaulès & le doz pour les raisons susdictes.

A ceste ratiocination penseront s'il leur plaist les susdicts artisans, ou practiciens de la Medicine, & se contéteront d'oresnauant de suiure la raison, l'autorité, & l'exemple des plus doctes qui s'y arrestent & le practiquent heureusement ainsi.

*Practique de ladiçte methode Theorique
mise és chapitres precedens touchât les
mouuemens, & sur tout au mytoyen
entre le pur critique & pur
symptomatique.*

C H A P. III.

NOUS auons assez deduit ce qui touche en general la saignée, les ventouses & la purgation, & les dommages qui aduiennent ausdicts enfans, pour la retardation d'icelle, & indiscrete conduicte de celles cy.

Mainte

Maintenant apres la susdictē Theorique des trois mouuemens , faut establir l'ordre qu'ō doit tenir pour le dextre vsage profitable & heureux & des vns & des autres. Parquoy incontinent qu'au temps que la verolle a cours, si ledit enfant cōmence d'estre chaud avec grande fiēre & quelques vns des signes susdicts qui deuācent la sortie des pustules, comme douleur de teste, baaillemens, estendemens de membres, inquietudes, ou profond sommeil, il faudra douter ou plustost s'asseurer que ledict enfant a ledict mal, & à l'instant sera bon de faire tenir à tous deux le regime dernier escript au chapitre de la Curation, & sās dilayer faudra appeller le Docteur Medecin, qui le voyant né au dessous d'un an, & ne treuant lieu de la saignée en iceluy, fera soudain saigner la Nourrice de la veine basilique du bras droict iusques à sept

ou huiet onces, & la purgera au iour
suiuant. Auquel s'il void la fièvre
perseuerer & l'enfant pouuant por-
ter la saignée, la luy fera audict
iour de la purgation de sa nourrice,
pour ne luy bailler sa purgation au
iour qu'icelle la prédra, & ne le trop
purger, par l'vne luy communiquât
au lait sa vertu purgatiue, & par la
sienne propre. Et à l'autre iour d'a-
pres baillera la purgation à l'enfant,
suiuant les Receptes icy apres mises
ou autres, qui bon leur sembleront.
Et s'il passe les deux ans, & ladiete
nourrice ne veut s'accōmoder aus-
dictes operations de la saignée &
purgation. Il s'arrestera à saigner
l'enfant, & luy tirera de trois à qua-
tre onces de sang de ladiete veine,
au matin, & au soir enuiron deux pe-
tites onces d'icelle mesmes en le
biē nourrissant entre icelles saignées
de trois en trois heures, & de son
lait & de bō bouillons de poullaile
&

& de moutō. Que si lesdictes taches rouges s'estoient ja d'escouuertes, deuant lesdicts iours, & suruenues si tost comme par surprise & desja fort druës, espesses & abondantes, fera saigner l'enfant de la veine du dedans de la cheuille du pied, mise dās l'eau chaudette en vn vase assez profond, & de raisonnable capacité pour luy tirer d'icelle en vne fois de quatre à cinq & à six onces de sang du pied, selon qu'il verra sa portée & condition du mal, ou s'il ne veut faire ladicte saignée du pied, encores qu'elle fut meilleure & equiuallable à celle du bras, qui se fut mieux faite auant l'apparition desdictes taches aux premiers iours, & qu'il ne se doit faire d'iceluy bras, icelles estant en grand nombre apparentes, (suiuant la regle des mouuemens deduiçts cy deuant, de peur de faire la concentration ou retirement en dedans, de la venenosité de la matiere aux parties

ties nobles. Alors pourra recourir aux scarifications & decoupeures, lesquelles fera executer par quelque bon maistre Chirurgien sur les deux greues, poulpes, & gras des iâbes, en dernier d'icelles loing du jarret & cheuilles, lesquelles decoupera avec le ventre d'une bonne lâcette de dix à douze tailleures superficielles & non trop profondes, en faisant trois ou quatre rangs d'icelles par bon ordre, ayant biẽ bafiné d'eau chaudette leſdictes parties & apres fomété avec huile chaudet la peau pour y mieux attirer le ſang & faire moins de douleur, en la laiſſant plus molle & aiſée à porter le tranchant du fer. Car par ce moyẽ fera la ſuſdictẽ reuulſion des parties nobles & autres, eſtans dans le tronc & buſte du corps, aux parties loingtaines baſſes & moins nobles, & ſ'il n'a tiré aſſez de ſang avec les uſdits baſſinements & fomentatiõs
il

il pourra y appliquer quelques petites ventouses, ou trois ou quatre sangsues préparées pour tirer environ lesdictes quatre ou cinq ou six onces de sang, selon la discretion & iugement du present Medecin.

De l'utilité des remedes de la saignée & purgation faiçtes à propos & dûement suyv. ant la susdiçte methode.

C H A P. I V.

LEs susdits remedes de la saignée & decoupeure & purgation se faisant à propos deschargeront nature d'une partie du faix de ce sang ichoreux & corrompu en partie, & disposé à plus grande corruption, si on ne la preuient par l'air frais mis & introduict dans les veines par lesdictes operations qui la puissent rendre aprez plus capable de pl⁹ aisément & avec moins de danger se desfendre & descharger du reste d'i-

celle, en poussant hors le demeurât desdictes pustules, qui couuent encores dedans, ayât receu la coction de la Nature ainsi allegée par lesdictes saignées, & purgations suyuan-tes qui ne se peuvent faire vtilemēt & sans hazard qu'au commencement comme l'on dict, commençant auât le quatriesme, en n'attendant l'augment ny moins l'estat, & plus haut temps de la maladie maligne auquel on ne doit molester la Nature ny la distraire de la coction, preparation, ou domptement de la matiere qui faiët le mal pour l'expulser après sur la fin dudit temps de l'estat. Soit donc pour toute resolution arresté que ladicte saignée soit faite au commencement encores bié qu'il appareusse en iccluy symptomaticquement ou accidentairemēt, quelques pustules veroliques. Car par ce moyen de la saignée, on procure à la Nature espoinsōnée & for-
cée

cée de la multitude, d'une maligne & veneneuse matiere d'un tel mal faisât ce mouuement auant le temps deu vn deschargement & amoindrissement d'icelle, & vn soulagement au fondement de sa fieure maligne en introduisant autât d'air frais, cōme dict est, que l'on tire du sang pour empescher sa plus grande putréfactiō.

De la prudence du Medecin és saignées, purgation, scarification, ventouses & sangsues. CHAP. V.

MAis il faut vser de telle sagesse & moderation, qu'on n'en tire pas tant en vne fois, que l'esprit manque avec la force, plustost il y faut retourner par deux & trois fois si besoing est pour aller au plus seur par Epicrase, en laissât remettre & renforcer Nature, en vn ou deux iours consequēment, par la reiteration de ladiète saignée. Et cependant faut desister de l'application susdiète

des ventouses aux doz & espaules.
Car la base & fondement de ce mal
estant dans les grandes veines, ne
peut prendre soulagement ny vuy-
dange profitable en l'application &
scarification d'icelles, mais par l'ou-
verture des veines mesmes: Et d'ail-
leurs la sortie d'icelles taches, venât
au cōmencement n'est pas vn mou-
vement naturel & critique puremēt
que nous ne deuons ayder à l'attirer
dauantage, par lesdictes ventouses
en la peau, ains empescher le bouil-
lonnement du sang, eōme on le faiēt
par l'ouverture desdictes veines. Et
quand l'aage de l'enfant au dessous
d'vn ou demy an seroit fort petit,
asçauoir de trois ou quatre mois ius-
ques au dict an, ou deux ans, En tel
cas on pourroit appliquer les dictes
ventouses, ou bien trois ou quatre
sangsues aux popil & gras des deux
jambes bassinées avec eau chaude,
pour en tirer trois ou quatre onces
de

de sang, nō sur les parties hautes du tronc du corps, mais au dessous des reins, sur la region de l'os sacré, appelé fondamental, & muscles fessiers, sur les cuisses exterieurement, quatre en nombre & deux à chasque cuisse en dedans, entre les aines & genoux, pour vuyder vne partie de ceste repletion virulente & maligne ou venir mesmes à la scarification des greues en eau chaude, de laquelle nous auons parlé cy dessus.

L'exemple & particuliere praëtique de Galen & autres en la scarification des jambes, & saignée, & des parties basses, aux exanthemes & morbilles ou Taches apparentes en tēps de pestilence ou malignité de sieure continue.

CHAP. VI.

ET parce moyen nous imiterons nostre Galen qui assure & dict

s'estre preſerué de la peſte qui re-
gnoit en certain tēps en Aſie, s'eſtāt
faict decouper les iambes, pour en
tirer ſelon ſa force & ſon aage iuf-
qu'à la quantité de deux liures, au
ſecond iour qu'il ſe ſentit frappé &
ſaiſi de ladiſte cōtagion & par icel-
les ſe deliura du danger de mort. Ce
que firent auſſi pluſieurs autres à ſō
imitation fort heureuſement. Le-
quel remede comme auſſi celuy de
la ſaignée de la veine du iarret, ou
de la cheuille du pied en dedans, ſe
peut auſſi célébrer & praſtiquer aux
grands, lors que les hæmorrhoides
accouſtumées à fluer leur ſont ſup-
primées, ſoyēt hommes ou femmes
& celles cy leurs fleurs arreſtées,
cōme auſſi en ceux qui affligez des
ſieures non cōtagieuſes, mais
pourtant malignes, ſe treuuent
couuerts de pettecchies & tac rou-
ge leur ſortant ſans qu'il aye pre-
cedé

cedé en leur curation aucune saignée, ou qu'elle leur aye esté faite trop petite & legere, moyennant que leur force soit mediocre. Et puis asscurer avec le tesmoignage de plusieurs, & grace de Dieu, en auoir gueri fort grand nombre, par semblable saignée, faite mesmes au huitiesme, dixiesme, & douziesme iour, par mon conseil, en l'apparition dudiect Tac rouge, & ceux qui l'ont mesprisé & ne l'ont fait à temps deu & enuiron les iours susdicts se sont treuuez auant le vingt-vniesme avec les assauts de mort. Neantmoins, si lesdictes macules verolliques, morbilles, ou tac suruenoit pour raison de la nature bien & purement critiquante, la crise ou iugement & terminatiõ paroissant parfaite & louïable avec force & allegement & autres bonnes cõditions

des malades au rapport du Medecin present, il ne faut rien mouuoir, ny irriter la nature, mais il luy faut cōmettre tout l'affaire, pour luy laisser paracheuer & parfaire son dessein commencé. Et si ladicte crise ou excretion & vuydange de ladicte corruption, qui se faiēt par lesdictes taches est imparfaicte, & non du tout accomplie (ce qui se cognoit par sa sortie & augmentation qui se faiēt d'icelluy) avec trauail, inquietude, anxieté, peine, & debilité du subiect (comme est dict cy dessus) il la faut alors ayder en tirant hors sa malignité par la mesme voye, qu'elle attend de se descharger.

Du morbille Tac rouge, violet & noir, suruenāts par fois, outre les trois especes dictes de la verolle parmy sa sortie, & du prognostique de chascun. CHAP. VII.

O Vtre lesdictes pustules verolliques, ainsi suyues de ses ordina-

dinaires cōpagnies, il se treuve sou-
uent vn traistre & mauuais garne-
ment, que nous appellons le morbil-
le, pourpre ou Tac, ou pettecchie en
Italien, portant aussi le nom d'exā-
theme qui par sa surprise & soudai-
ne descouuerte & pour la vehemen-
ce ou violēce de sa malice s'aquiert
à faute d'estre preuenu & chastié par
par la saignée ou scarifications fai-
ctes deüement en leur temps, s'il est
rouge, vne certaine malignité à cau-
se de sa generation procedant du
sang cholerique, malin de foy, mais
aucunement domptable: Que s'il se
rend violet, plombin, verd, ou noir,
à faute d'y pouruoir par les susdicts
remedes dela Chirurgie & Pharma-
cie, tant externes qu'internes, nous
designé & monstre vne telle mali-
gnité, & qu'il y a peu de remedes
qui le puissent empeschér, qu'il n'e-
stouffe par son apparente malice &
message funeste la chaleur naturel-

le mere nourrice & entretien de la vie, quelques Alexipharmques cōtrepoisons & bezoardiques potions qu'õ y apporte, qui sont le plus souvent inutiles, ou seroit lors que la nature se voyant comme perdue comme aussi le medecin quasi hors d'esperance s'esforcēt de tout leur pouoir à chercher & treuver quelque moyē extraordinaire & comme miraculeux avec la grace de dieu, pour tirer le patient hors du cercueil & liēt de la mort. Au contraire la verolle rouge avec ses deux espèces, si elles paroissēt poulśées par le mouvement purement critique ou mi-toyen & sont bien soignēes & tenues de près & suyues de remedes, reçoquent le plus souvent appoinctemēt de guerison, pour apres beaucoup de fectices qu'on luy a faictz laisser viure le subiect & esclaye d'icelle en la campagne large de la santé.

*De l'usage & pratique particuliere contre
toutes les especes dudit Morbille &
Tac pour preuenir & combattre
le danger de mort.*

C H A P. VIII.

PARquoy d'autant qu'en c'est affaire fort important, veu qu'il s'agit de la vie ou de la mort, à cause de la cautele & malignité de ceste partie traistresse & vitieuse qui est la verolle, morbille, ou Tac, Senepon, ou pourpre, si la nature comme bõne procuratrice & aduocate ne se descharge entierement bien sur la peau, qui luy sert comme de chambriere ou d'emonctoire pour nettoyer les ordures & vilennies de ceste corruption interne: sera bon de la fortifier par vne tresbonne nourriture, par restaurans & potions cordiales qu'õ luy administrera tous les iours & par epithemes solides mis sur le cœur, mesmement par pigeõneaux

ou poullailles , parties par le doz & surpoudrées, de poudres cordiales, qu'on y mettra sur le cœur, & parties voy fines (ainsi qu'a esté dict cy dessus en la methode Theorique) chaudement en continuant durant trois ou quatre iours, deux fois le iour. Et apres y auoir demeuré deux ou trois heures, on y en mettra d'autres, ou on y remettra l'epitheme cordiale solide & chauffé. Et quand à la peau on l'oindra generallement & chaudement d'huyle d'amandes doulces, & de Camomille, ou de lys, beurre frais ou graisse blanche de pourceau, ou poullaille non salée, adioustant à toutes lesdictes coctiōs vn peu de vin blanc ou claret, pour ayder à l'ouuerture des pores, & petits pertuis ou trous de ladicte peau. Et s'il y a lieu, principalement, s'y voyant le Tac noir, violet, ou plombin, luy appliquer les ventouses decoupées, superficiellement en premier

mier lieu sur lesdictes parties basses, on luy scarifie les iâbes, & après lesdictes taches noyres, ou plombines, comme auons dict, lors se verra vn tres-bon secours, & entre autres on s'aydera des Cantharides, & autres attractifs mis sur les parties ignobles, & esloingnees du tronc du corps, comme a esté mis cy dessus au chap. 9. du second Liure.

*De l'usage & ayde des sucurs en l'apparence des Taches morbilles ou exanthe-
mes de toutes sortes & des diuers
moyens les prouoquants.*

C H A P. IX.

DAuantage en tels accidents, & extremités le meilleur & plus expedient remede est de cōtinuer la prouocation des sucurs. Ce qui se peut faire par la decoctiō d'vne poignée de grains d'orge entier, & de
l'her

l'herbe apellee myrrhis ou cicutaria
en prenāt aussi vne poignée & apres
estre bouillis en eau de fontaine pas-
sés par l'estamine & pressez faut de-
stréper en la quātité de 4. 5. 7. 8. ou 10.
onces solon les aages & les corps, 2.
onces de syrop de limōs, ou biē pré-
dre vne drachme de poudre de dia-
margaritō froid & vne autre de dia-
tamarin, pour les destréper avec de-
my drachme de confectiō alkermes,
& 4 5. 7. ou 8 onces de la decoction,
de demy once de racines de gramē,
ou chiédēt lappa maior & angelique
& en la colateure pressée adiouster,
apres lesdictes poudres, vne once sy-
rop de lymōs, & vne syrōp de capilli
venetis, pour leur faire prédre au ma-
tin sur le point du iour chaudement
& les ayāt biē couuerts leur prouo-
quer la sueur: la sueur passée & sup-
portee vne bonne demye heure, les
faudra fort secher tout le corps, avec
linges chauds & mollets, & apres
leur

leir mettre sur le cœur l'Epitheme solide suyuant, ou alternatiuemēt les poullets ou pigeõneaux susdits partis par le milieu, surpoudrez des susdictes poudres cordiales apres lesquelles applications se mettra l'Epitheme cordial faict cōme s'ensuit sur le cœur dudit malade.

Prenez cōserue de buglosse & violettes de chascune vne drachme & demie, theriaque fine vne drachme, cōfection alkermes demy drachme, trochisques de cāphora vn scrupule, huile de scorpiõ de la descriptiõ de Matheol six gouttelettes, saffran seché & pilé quatre filamens, meslez y tout biē ensemble en y adioustāt vn cuillier syrop de limõ pour estēdre apres ceste matiere sur d'alude ou drap rouge de l'estēdue d'vne main, & la mettre apres en lōg ou en biais, sur la region du Cœur. Pour lesquelles sueurs ayder, si les remedes susdicts ne suffisoient faut tremper
laup
qua

quatre esponges fines, lauées de la
largeur d'environ vne main esten-
due, en eau de cardon benist mēlée
avec la moytie de bon vin blanc ou
clair et chaudemēt, & les ayāt apres
esprainctes, en faut mettre vne sous
chascune aysselle, & vne sur chasca-
ne aisne avec petits linges mollets,
& bien chauds au dessus. Car reite-
rant lesdictes applications des espō-
ges remoīlées, pressées & mises plu-
sieurs fois sur lesdictes parties on ne
peut faillir d'entrer en quelques
sueurs generalles & notables, sur-
tout si on couure tout le corps rai-
sonablemēt & que le malade s'y ay-
de. Lesdictes sueurs ainsi procurées,
sechees & passées, faudra soulager la
nature par bonne nourriture avec
bons bouillons de mouton, & chap-
pons bouillis avec force ozeilles,
bourraches, & foueys, & quelque
poignée de l'herbe scorzonera ou
de sa racine ou de celle d'angelique
quel

quelque drachme mise en poudre, ou quelques grains en nombre de deux ou trois de bõ bezoar, ou quelque scrupule de perles preparées, ou de la confection Alkermes, ou de hyacinthes. Et si la debilité y est trop grande ne faudra oublier les pressis de quelque bõ chappõ, phaisan, perdrix, ou pigeonneaux, & au deffaut d'iceux les ius des Cœurs de mouton, ou carbonades d'une esclanche ou gigot d'iceluy, mises entre deux plats & tirées par la vapeur de l'eau chaude, mise dans vn grand pot, ou par sa vapeur faire bouillir lesdictes chairs mises entre lesdicts plats, biẽ estoupés & ferrés avec de la paste, desquels ius meslés avec lesdits bõs bouillons, on nourrira le subiect de debilité en y adioustât & desttempant à chascune fois vne petite cuillerée du condict & restaurant suyuant.

Prenez conserue de violettes, & fleurs de bourraches & dœilletts, de

chascune deux drachmes, confectiō
alkermes & de hyacinthes, de chas-
cune vne drachme, perles preparées
corne de Cerf préparé de chascunes
quatre scrupules, bol de leuant pre-
paré, terre sigillée, de chascun deux
scrupules, sucre rosat tabulat mis
en poudre, au double de tous les in-
grediens, feuilles d'or six en nom-
bre, pour en faire ledict restaurant
doré dedans & dehors, & ce par la
main de quelque suffisant & bien
pourueu Appothicaire qu'employe-
rez ordinairement pour le seruice
dudict malade. Il faut esperer beau-
coup desdictes sueurs, de la bonne
nourriture & remedes cordiaux &
autres seruices bien continuez avec
la grace de Dieu implorée en ces
extremitez & dangers. Car la Natu-
re biē aidée en ce combat sort heu-
reusement d'iceluy en rapportant
la victoire de son ennemy combien
que par ces infections & taches du
cuir

cuir il se voye peu souuent ces malignes & pestilentes fieures critiquer, & se iuger & terminer bien loüablement & parfaictement sinon aidée de tous les precedēs remedes, d'autant que aucune petite excretion n'est critique ou terminatiue, & que Nature ne vuide pas bien quand elle vuide peu. Or ces petites taches poussées au cuir ne sont riē presque à l'esgal de la grande quantité de l'humeur pourry corrompu & cōme veneneux qui est dedans le corps & d'ailleurs la matiere qui faiēt ceste infection est beaucoup plus tenuë & subtile que n'est le fondement de la pourriture des humeurs gastés dans les grandes, mediocres & petites veines, ou de quelques parties nobles enflammées ou suppurées ou d'aucunes leur seruāt prochainemēt & necessairemēt, & n'est aucunemēt suffisante pour l'extirpatiō d'icelle seule, si lesdictes sueurs procurées

&

& grandes, ou quelque hamorragie & flux de sang du nez, ou des hemorrhides, fleurs menstrielles ez femmes, ou abortissement qu'elles portent, ou grand flux d'urine, ou dyssenterie hepaticque, ou autre espece de flux de ventre, ne le sauue, ou quelque ayde miraculeuse de Dieu, & de l'Art.

*Des malheurs qui suyuent la saignée
mesprisee au commencement.*

C H A P. X.

ET pour toute conclusion de ce discours touchant ledict Tac auquel me suis ainsi fors diuertí, pour l'ayde & secours des petits enfans & autres malades. La plus grande assurance de la santé du malade de ces fleurs malignes critiquées douteusement par les bourgeois de la petite verolle, s'en-
pon,

pon, pourpre ou Tac, & semblables
infections du cuir, se doit colloquer
& remettre en l'Euacuation assés
grande & reïterée deux & trois fois
si besoin est faicte tout incontinent
au principe de ce mal pestilent &
maling ayant cours comme á esté
amplement demonstté cy dessus.
Ce qu'il falloit necessairement fai-
re, pour la considerer & traicter par
le menu, pource que c'est le princi-
pal & plus souuerain remede entre
tous, & trop souuent mesprisé (con-
tre leur honneur & profit des ma-
lades) par quelques Medecins Hæ-
maphoues, craitifs & ennemis des-
dites saignées, trop complaisans
aux femmes, & semblables appre-
hensifs d'icelles, sans estre fondés sur
les susdictes raisons, & autres
deduittes par noz sages
docteurs traictés de
ceste matiere.

* * *

*De la purgation discrettement réglée
selon qu'il a esté cy deuant
deduict.*

CHAP. XI.

Q Vand aux purgations de ladi-
cte nourrice & enfant, que
nous auions remises apres les sai-
gnees se pourront faire aux iours,
qu'on ne fera lesdictes operations,
incontinent suyuant & apres icelles
immédiatement & sans delay cōme
s'ensuit ou comme le Medecin pre-
sent l'ordonnera apres ou deuant
icelles operatiōs, & par la main d'un
bon Apothicaire, & premierement
pour la nourrice.

Prenez decoction commune de
Medecine refrigerante & cordiale
quatre onces, en laquelle destrépez
demy once de catholicō, deux dra-
hmes diaphenicō & deux drachmes
de

de la confection hamech, vne once syrop rofat laxatif & vne once syrop de Chicorée composé avec Reubarbe, poudre de reubarbe, corne de cerf preparée, centonique & coraline de chascune vne demie drachme, & du tout bien meslé faites en la Medecine, pour la luy donner au second iour, auquel on aura saigné l'enfant, l'ayant purgé au premier iour, ou au troysiesme ou plus tard, comme s'ensuit, & s'il est moindre de deux ans.

Prenez reubarbe, coraline centonique, corne de cerf de chascun vne scrupule, poudre de diamargaron froide demye scrupule, trois drachmes de l'electuaire lenitif, syrop rofat laxatif & syrop de chicorée fait avec la reubarbe de chascun demye once, destrempez tout cela avec vne once & demye d'eau d'endiue & de pourpier, pour en faire la Medecine dudit enfant.

Et la luy bailler selõ l'aduis du sieur Medecin present, qui les pourra augmenter & diminuer selon sa discretion, & prudence ayāt mises ces descriptiõs & receptes pour m'accommoder au deffaut & absence d'ice-luy, ne s'y treuuant commodement pour les faire faire au present & suffisant apothicaire, lors qu'il ne pourra estre accompagné. Or iacõit que i'aye dict cy deuant que la plus part des medecins qui ont escript, & ceux qui exercent la medecine au iourd'huy ne la mettent en controuerse, si est ce que l'vn, & entre autres le tres-dõcte Mercurial la distingue ainsi: *Q*u'à l'enfant trop petit, comme au premier mois iusques au septiesme, s'il le faut purger, medicamenter, il le faut faire par le moyen des nourrices. Car les medicamēs qu'elle prendra, gardēt leurs forces & vertu au sang & au laiēt, ce qu'Hippocrate & Galen confirme.

Pour

Pourtant n'y a doute, qu'on ne puisse & doive purger ladicte nourrice à ceste occasiõ apres ladicte saignée par le medicamēt icy mis, ou vn peu gaillard, aux fins qu'à la lōgue trās-mutation & coction d'icelluy passant par tant de passages il s'en porte quelque efficace purgatiue, legemēt toutesfois, au laiēt d'icelle, & par icelluy succé à l'enfant. Mais les enfans grandelets d'vn ou de deux ans & plus qui ont desia amassé humeurs ou ichoeurs superflus en leur masse sanguinaire & aux passages communs, comme causes antecessantes, lesquels apportēt tant d'inconueniens & accidents quand la fiere continue putride s'y met, cōme est diēt cy dessus, il s'y faut conduire comme la necessité de ladicte purgatiō se descouurira cy apres. Si donc l'enfant est desia grand, & paroist plein de mauuais humeurs & qu'il y aye quelque matiere tur-

gente, vagãte & furieuse qui excite quelque spasme ou cõuulsiõ epileptique cõme ie l'ay veu souuēt aduenir à la sortie de ladicte verolle pour petits qu'ils soyent voire mesmes nez & aagez d'vn ou de deux moys (cõme ie l'ay heureusement practiqué en mes enfans mesmes) adõc ne faut craindre la purgation qui se pourra faire avec le medicamēt mis cy dessus ou avec mãne, syrop rosat, syrop de cichorée avec reubarbe, poudre contre le spasme, & eau de poncirade & buglosse. Au reste si le Medecin cognoit ladicte purgatiõ, n'estre trop necessaire, pour estre appellé trop tard, & sur le poinct de la sortie desdicts bourgeons, pour n'espescher le mouuemēt de la Nature, adõc vsra de quelq̃ petits clisteres faits avec la decoctiõ d'horge, prunes, figues & sebestes, y destrempāt miel violat, cassé fraische ou mãne & sucre de chascū vne once & de mic.

Fin du troysiesme Liure.

LIVRE QVATRIESME

*Des moyens pour pouruoir aux accidents,
qui suyuent ladicte verolle vraye & ses
especes particulierement, & en premier
lieu des aydes & remedes qui aduan-
cent leur sorties.*

CHAPITRE PREMIER.

RESVPOSANT que les re-
medes generaux de la diet-
te, phlebotomie, scarifica-
tion, ventouses, sangsues, & purga-
tions, sueurs, & tous autres qui
aydent par dehors, tous les acci-
dents desdites taches & tumeurs cō-
tre Nature, soyēt decidez & deduits
le plus parfaictemēt qu'auons peu,
pour dompter & cōbattre les fon-
dements du mal principal de ceste
petite verolle morbilles & Tac &
des symptomes qui les accōpaignēt
au cōmencemēt, nous pourfuyurōs

les autres, qu'auions suspendus ius-
qu'en ce lieu, pour les cōbattre par-
ticulierement au progrès d'icelle. Et
d'autant que par les susdicts reme-
des generaux on a peu pouruoir à la
douleur de teste, spasme, phrenesie,
trop grādes veilles, ou sommeil pro-
fond & autres semblables, il faut
puruoir à present à la difficulté ou
tardiueté de l'issue & sortie des pu-
stules veroliques, si tant est que les
signes qui les precedent & accom-
pagnent monstrent leur paresse.
Donques laissant à part les remedes
du Tac ou pettecchies & pōurpre
cy dessus mis pour les fleurs mali-
gnes & pestilentes, pour auoir parti-
culiere cōsideration, aux bourgeo-
nemens veroliques, pour les aduan-
cer, faudra tenir l'ēfant vn peu plus
chaud, & faire ce qui a esté dict cy
dessus au commencement de la cu-
ration: & les y faudra ayder, en leur
baillant la decoction suyuant ius-
ques

ques à la quantité de deux à trois onces, deux fois le iour, continuant trois ou quatre iours apres ledict cinquiesme.

Prenés horge entier vne poignée, racines de gramen ou chien-dent demy once, racine de fenoil trois drachmes, fueilles de capilli veneris vne poignée, fueilles d'aigrette, & scabieuse, petites figures grasses, vieilles ou nouuelles huit ou dix, bones létilles vne once & demie semence de chardon benist, d'ache & fenouil de chascun vne drachme, reglisse vne drachme & demie, faut tout bouillir ensemble en vne feuillette & demie d'eau, & iusqu'à la cōsumptiō d'un tiers, & en la colature sans l'exprimer destremper syrop de limons & de capilli veneris, de chascun deux onces, ayant le tout bien meslé & clarifié, se gardera au frais dans vne phiole & apres en faudra bailler cinq ou six cuilliers à l'ëfant

vn peu chaud, vne heure apres qu'il
aufa tette, & vne autre heure auant
qu'il tette, & ce deux foys le iour à
six heures du matin, & à troys apres
midy, & l'ayder apres à fuer s'il peut
dans le berceau ; ou petit liêt, &
l'ayant changé de ces linges moit-
tes, luy donner à tetter, ou du pot-
tage à son accoustumée, ou à man-
ger s'il est grand elet, & à boire eau
cuiète avec syrop de limons ou
d'aigriottes, de grenades ou du vio-
lat ou aceteux & nullement du vin
ny à sa nourrice mesmes. La nourri-
ce en pourra aussi prendre tous les
iours de la mesme decoction cinq
ou six onces au matin, & autant au
soir, & se tenir retirée & chaude, a-
uec son dict nourrisson, en refaisant
de fresche quand manquera, & vser
en son boire ou d'eau ptisanè ou
decoction de racines de gramen, &
point de vin avec icelles, pour ne
faire tort à l'enfant.

Des aydes & moyens pour ayder par dehors les eruptions & sorties des pustules & bourgeonnements tardifs de la verolle.

C H A P. I I.

LAdicte decoction finie, avec la prouocation des sucurs à l'enfant si faire se peut : si lesdictes pustules de verolle ne sortent fort il les faudra oindre avec les huilles bien lauez en eau tiede , pour leur oster la chaleur & acrimonie , ou avec moelles de pied de veau ou de beuf ou de porceau fraisches , s'il s'en peut treuuer, ou autres graisses fraiches ou beurre frais susdicts, iusqu'au septiésme iour pour soulager leurs douleurs auquel ont accoustumé d'estre presque toutes sorties , ou iusqu'au neufiesme ou dixiesme & onziésme , faudra incontinent apres leur maturation, estant bien blanchies les percer, avec vne esguille d'or ou d'argent,

ou autre fine, ou avec esplingues de rain & non esguilles de fer, & entre autres celles qui seront meures blanches & plaines de matieres boüeuses ou putulentes & pourries, & les secher apres avec linges mollets, ou cotton, de peur qu'elles ne laissent des fossetes, & creux ou vlcères facheux à guerir, quand la matiere y croupit trop; sur tout en la face. Et celles qui demeureront caues & dures ou opiniastrés à se meurir, les faudra parfumer ou fomentier avec la vapeur de la decoction suyuant, ou linges mollets trempez en icelle & appliquez dessus chaudement.

Prenez graine de lin & de fœnugrec, de chascune vne once, graine de malue blanche, grain du bled, de chascun demy once, figues grasses, pances mondees, chair de dattes grasses & bien meures de chascun vne once & demye, fleur de camomille & melilot de chascune demy poia

poingnee, faiçtes le tout bouïllir, pour en faire lediçt parfum, ou fomentatiõs aux lieux où lesdictes pustules apparoiſſent, telles qu'auons dict, & ce deux fois le iour, les oignant eſtât ſechées avec lediçt beurre, graiſſes, où huilles, accommodés comme dict eſt. Et eſtât meuries les ouurirõt ſi elles ſont grâdes en plusieurs lieux avec ladiçte eſguille, ou perſerõt au moins d'outre en outre, pour en faire ſortir la matiere & la ſecher, avec linges ou cotton, comme dict eſt.

Remedes pour deſſecher les bourgeons de la verolle apres la ſuppuration, & mondification.

C H A P. III.

LEs ayans ainſi traictées & mondifiées iuſqu'à l'onzième, douzième, trezième & quatorzième, les faudra lauer avec l'eau ſuyuâte pour ayder à les deſſecher & faire tomber

les croustes en les preparant à cela par ce lauement suiuant.

Prenez horge & lupins conqassez de chascun six drachmes feuille de meurthe, tamarisque, & l'entisque ou oliuier sauuage de chascun demy poignée, roses vne poignée, saffran vne drachme, du camphre, des trois fantauls de chascun demy drachme, miel trois onces, sel nitre ou felpetre deux cuillers d'argent. Faiâtes le tout boiïillir ensemble dans quatre ou cinq liures d'eau estant coulé le tout, d'un peu mys à part lauez en tiedement vne partie apres l'autre, selon qu'elles se trouueront purgées de leur ordure, & apres les oindrez de l'oignement suiuant.

Prenez onguent blanc, faiâ avec camphre & vn onguent de litharge nourry avec les sucz & sans aucun vinaigre de chascun vne once & demie, onguent rofat vne once,
huile

huile rofat demie once, meslez les ensemble & tenez en vn pot de verre ou de terre vernissé ou estamé. Et s'ils ne sont bien frais faictes les lauer avec eau rose & comme aurez lauees vos verolles meures, purgées & seches, mettez dessus desdicts onguens meslez ensemble, les oignant doucement avec le doigt, ou avec vne plume tiedement, & les couurez de petits linges blancs, ou drapelets mollets, vne fois ou deux le iour les tenant retirez de l'air froid, en leurs liets ou berceaux. Et continuez cela iusques à tant que les croustes amollies soyent tombées & les vlceres sechés au visage & sur tout, & par tous les membres mesmes & les redrez nets d'icelles si les traictez soigneusement.

* * *

F 6

Remedes & moyens pour faire abolir les
fossetes & creux pendant qu'ils sont
frais & la peau tendre, delaisées par
les boutons de la verolle non bien pen-
sés & traictés.

C H A P. IIII.

OR si en la face demeurēt quel-
ques cicatrices creuses, (ce
qui n'aduiendra si les conduisez cō-
me dict est, en les pressant, lauant &
oingnāt à temps deu il les faut frot-
ter) auoc l'oignement suyuant.

Prenez moelle de iābe de bœuf ou
de veau deux onces, graisse d'asne
fondue & lauée avec eau Rose trois
onces, litarge dor & ceruse de Veni-
se bien preparez par l'Appothicaire
de chascun deux drachmes, farine
de ris & de feues passées par le tamis
de foye de chascune deux drachmes
& demye, tuthie preparée vne dra-
chme & demye, huile d'amandes
doulces & ameres extraicts sās feu
de

de chascū vne once & demye, camphre dissout, avec eau rose quatre scrupules, sperme de baleine demye once, borraux, sucre cādi, de chascun deux drachmes & demie. Ayāt meslé lesdictes poudres avec demie once (si voulez & si en pouuez recouurer) de la poudre de l'onguent citrin, mettez y de cire blanche fondue avec lesdictes graisses & huylles à la discretion de l'Apothicaire, pour en faire forme de linimēt. Duquel to⁹ les iours deux fois asçauoir au leuer & coucher de l'enfant, luy en oindres le corps, & sur tout la face, pour la rendre exempte de la difformité des creux & fossētes, qui y pourront demeurer vn peu chaudement, y mettant linges mollets dessus & les changeans à chasque fois.

Et si leur voulez encōres faire vne distillation pour rēdre leur face plus nette & belle la ferez comme s'en suit, mais auant que venir à l'vſage d'icel

d'icelle ferez appeller le Chirurgiẽ
mesmes qui avec le rasoir abbatte
& rasele doucement les croustes du
visage ja amollies auant qu'elles y
croyssent trop & ne gastet la peau,
& apres la pourrez lauer de la deco-
ctiõ d'horge & de mauues & l'oindre
& frotter ou de l'onguent sus-
dict ou d'onguent blanc ou d'on-
guet citrin si en pouuez recouurer,
& leur faire faire vn laiẽt virginal,
pour en vser durant quelques iours
auant ladiẽte distillation, qui se fera
en ceste facon.

Prenez litharge d'or & d'argent,
de chascun quatre onces, vinaigre
blanc vne liure & demye, bouillez
cela ensemble iusques à tant qu'il
s'en consume le tiers, apres distilles
les, mis dans vn plat de terre vittrẽ,
avec labeaux de feutres, & mettez
la distilatiõ en vne phiole, apres pre-
nez alum crud quatre onces, faictes
le bouillir en deux liures d'eau de
font

fontaine pure y adioustât camphre dissout avec eau rose deux drachmes, vne drachme & demye bor-rax & vne drachme de sel Armo-niac, apres pilez & destrempez, coulez tout cela, & meslez en-semble les deux decoctions, pour en faire vostre dict laiët virginal, duquel ferez vser & lauer le visa-ge dūdict enfant ou fille soir & matin pour deterger & manger les restes des cicatrices & luy blanchir le tein, & durant sept ou huiët iours apres lesquels se lauera ordinaire-ment tant que bon luy semblera, de la susdicte distillation, suyuant ceste recepte.

Prenez ceruse lauee, litharge pré-
parée d'or & d'argent de chascun
deux onces, farine, de febues, de ris,
& de phasiols, de chascū quatre on-
ces, gōme tragagtgantā vne once,
la mie d'un pain blanc chaud, vne
douzeine de blācs d'oeufs bien bat-

tus & leur coque pilees subtilement,
 mastic vne once & demie, alū de ro-
 che deux onces, demy once cāphre,
 demy once borraꝝ, eau ou liqueur
 qui se tteune dans les gouffes de
 l'arbre d'orme six onces, le dedans
 de deux beaux limons frais, deux es-
 cuelles de laiꝛt de cheure ou d'anes-
 se, vne liure de verjus en grain ou
 liquide, vne pinte bon vin blanc,
 battez & meslez tout cela ensem-
 ble & le laissez en infusion dans
 vn grand pot de terre vernissē,
 & au bout de trois iours mettez
 le dans l'alambic de verre pour le
 faire distiller au bain marie. Et n'ou-
 bliez d'y mettre, vne liure sucre
 fin, & autant de quelque beau miel
 & huit ou dix grains de musc
 dissolt avec eau rose si la vou-
 lez plus excellente, & odo-
 riferante pour les per-
 sonnes riches.

Procédure plus aysée pour la rougeur & fossettes du visage apres la verolle & de moindre despense, que ceste la qui est mise au chapitre precedent, surpassant toutesfois ceste cy en bon effect.

C H A P. V.

ET pource que particulieremēt les vestiges & traces desdictes pustules verolliques, sont suyues de la mauuaise couleur de la face outre lesdictes fossettes, qui les suivent, iacoit que les susdicts remedes y foyent tresbien accōmodez pour les effacer & applanir, si est-ce qu'il ne sera impertinent incontīnt que les escailles tomberont de lauer la face & les mains de ceste matiere suivante, si ne voulez que le Chirurgiē y touche, afin qu'ayez diuers remedes pour cet accidēt perdurable à iamais, s'il n'y est pourueu à tēps.

Prenez lupins, febues, & horge de chascū vne poignée, battez les grossiere

fierement faites les tous bouillir en eau iusqu'à tant qu'il s'en face comme vne bouillie, & en froterez & lauerez lesdictes parties chaudemēt le soir à l'entrée du liēt. Au matin lauez lesdictes parties de la distillation suyuant.

Prenez vn couple de beaux limōs frais & pelez, deux poignées des fueilles de la serpentaire maieur, & vn quarteron de ses racines, & deux pieds de veau bien blancs sans la peau, faictes couper menu toutes ces choses & après mettes les en l'alam-bic de verre pour en extraire vne distilatiō par le bain marie, de laquelle ferez lauer & bien froter la face & les mains au l'endemain matin, la surpoudrāt avec la poudre composée suyuate, apres que l'aurēs ointe de graisse d'hōme, d'ours ou d'asne fondues ensēble, ou d'vne d'icelles & lauées diligemment d'eau rose, pour les garder dans vn pot de verre

pour

pour ces fins avec succre en poudre.

Prenés racines de cannes & des couuercles de tortues mises au four pour les secher ensemble en esgale quantité, & en ayât apres faict poudre subtile en ferés espandre & surpoudrer lesdictes parties, & si pour cela continuent quelques iours lesdictes fossètes & creux ne s'esfaisēt & comblent entierement, comme estant fort mal aysé de repater selon la premiere intentiō la chair & peau qui s'est perdue & rōgee, par l'acrimonie de ceste matiere corrompue qu'on a trop laissé couuer sous la peau desdictes pustules & boutons; on pourra faire fort frotter & faire rougir laditte peau ainsi enlaydie avec la main, ou quelq; drap vn peu asprement & rudement, sans toutesfois l'escorcher, & estant icelle rougie, & hiē colorée s'y mettra vn emplastre de poix y meslant la quarte part de mastich en poudre, pour en

mettre

mettre sur lesdictes parties moyennant qu'il ny ayt du poil, & ce vn peu tiedemēt, pour l'en oster apres quelques heures avec force & violence en continuant ceste procedute durand quelques iours, vne ou deux fois le iour. Ladicte operation finie par ce medecament metasyn critique & attractif de la matiere ou peau profonde en dehors, on pourra oindre lesdictes parties avec le liniment suyuant.

Prenez huile d'oliues tres doux vne once & demie, ius de limōs trois onces litarge d'or lauee, & cendres des couueroles de tortues sechees au four, de chascun vne once & demie, poudre de racines de cannes sechees comme dessus deux onces, graisse d'homme, d'ours, d'asne, ou de poullaille vne once, meslez toutes ces choses ensemble pour en faire ledict liniment que mettez pour toute fin tous les soirs sur lesdictes

parties, les lavant au matin desdictes distillations, & j'espere que les peres & meres desdits subiects avec eux en receuront tout le contentement qui s'en peut & doit esperer, n'ayant pas voulu avoir soin seulement de la santé, mais aussi de la bonne conformation & beauté première.

Preservation des yeux pour les garder des taches, ulceres, gresles ou perles en leur conioinctive & prunelle, ou y aduenantes icelles, comme on les en guerira.

CHAP. V. I.

AV reste il ne faut avoir seulement cure & soing de la beauté apres estre eschapé de la tourmente desdictes pustules, mais de beaucoup d'autres accidens qui les suivent ou accompagnent. Et premierement de la deffence des yeux pour les garder, de la tache ou taye, que
graine

quelque pustule ou bouton de la-
dicté verolle vlcéré, qui vient en la
tunique adnata ou conioinctiue, ou
en la prunelle, leur laisse. Pourtant
n'oubliez incontinent à les def-
fendre, avec la liqueur suyante les
faisant retirer de l'air trop clair.

Prenez graine de fumac, graines
de coriandre preparez, de chascun
vne drachme, graine de meurthe
demy drachme, pilez lesdictes
graines ensemble, & apres les a-
uoir liées dans vn linge ou toile
neufue & clere, donnés leur trois
ou quatre bouillons, estés mis dans
d'eau rose, & plantain de chascun
quatre onces, dans lesquelles de-
strempez demy drachme de cam-
phre & quatre ou cinq filets de saf-
fran pilé, & gardant cela en vne
phiole, apres auoir pressé ledit lin-
ge dedans en mettez vn peu dans
vne escuelle ou verre pour leur en
degoutter dans les yeux bié ouuerts
auec

avec vn peu de cotton ou linge mollet, ayant fait coupper du poil des paupieres, bien prez d'icelles, & le mettez tiedement en temps frais, & froidement en temps chaud. Que si avec tout cela ne pouuez empescher, que ladiete tache ou taye ou gresse, suyuant l'vlcere qui est laissée par quelques pustules y naissante ne s'y face, aydez vous du lauement d'eau de miel, d'eau d'euphrase & de fenouil, mises souuent dedás, ou de quelque goutte d'huylle de myrrhe extraict, avec les blancs d'œufs cuits durs, & autres particuliers remedes comme poudres de sucre candy, fiente de lezard & os de seiche, en prenant de chascū vne demie drachme en plusieurs fois pour en mettre vn petit avec le bout des deux doigts sur ladiete tache, ou en destremperéz vn peu avec lesdictes eaux pour leur en faire distiller

dans

dans les yeux avec linge & cotton quelques gouttes. Et si leur excite quelque douleur, leur iecterez dedás vn peu de laiët frais tiré du tectin, ou faires autres remedes & secrets ordonnez bien à propos par le docte medecin & non à la mode du vulgaire, si ladiete tache se rēd opiniastre à ceux cy, pour ne luy faire perdre du tout la veuë, comme aduient souuent à ceux, qui ne sont bien conseillez.

*De la preservation & curation des vlceres
de dedans le nez ou narines.*

C H A P. VII.

Tlendrez pareillement les conduicts du nez & oreilles nets avec le beurre frais, pomade ou onguent de Tuttie faiët avec l'huile violat dans le mortier de plomb. Mettez aussi des linges trépez dans la mixtion ordonnée pour les yeux
roses

sur son nez, & dans iceluy & au dedans des oreilles, afin que les boutons ne s'y mettent, les lauans quelques fois, avec plumes trempées dás ladicte eau des yeux, ou ius de grenades douces & aspres y fourrás des petites tentes oinctes desdicts oignemēs, ou le faisant syringer par fois avec ius desdictes grenades ou decoctiō de plárain, prunelle, roses fines, prenát d'icelle vne liure & 3. onces de syrop de roses seches, ou miel rosat à son deffaut ou diamorum pour les en syringer tiedemēt deux ou trois fois le iour, y remettant apres desdicts linements, & les nettoyant avec meches & tentes de linge mollet bien & duēment iusqu'à leur parfaicte guérison & consolidation.

*Preservation des vlceres de la gorge, go-
zier, trachee artere, poictrine
& poulmons, & de leur
Curation.*

C H A P. VIII.

FErez de mesme que la gotge & gozier soyent tenus nets & frais les faisant souuent gargariser de la decoction du chapitre precedent, ius de grenades douces, & non n autres, syrop aceteux ou de roses seches, en faisant destremper deux ou troys onces avec liure & demye de l'eau de plantain & de cheurefueil de chascun demye liure, & luy faiçtes tenir souuent en la bouche, ou succre rosat tabulat ou tablette de diatragant, ou aigriottes fresches, ou confictes trempées dans eau fresche, ou lambeaux ou tranches de pommes, ou poires fresches & vicilles, & s'il y a quel-
que

que vlcere, ou graine de verolle qui s'y mette & les rende rauques ou touffilleux, faiçtes luy aualler quelque cuillier de syrop violat, ou de iuiubes ou conserue de roses; detrempée avec ptisane, ou il vsera du looch suyuant.

Prenez semence de coings & de Psyllium de chascune vne drachme & demye, semence de cotton vne drachme, graine de pauot & de celle de plantain autant, lentilles mondes de leur premiere peau quatre scrupules concassées & pilées chacune apart mediocrement, & apres ensemble assez bien, & les mettez en vne escuelle pleine d'eau rose & de plâtain l'espace de deux ou trois heures sur les cédres chaudes, apres passez le suc desdicts mucillages ou autre substâce qui s'en pourra titer & exprimer d'icelle mixtion avec vne estamine bõne & neufue, & en l'extractiõ qu'e aurés fait meslez &

battez biē trois onces de l'electuaire de diatragant froid & trois onces de syrop violat & iuiubin, battant le tout bien ensemble dans vn mortier pour le mettre apres en vn pot de verre de la capacité que cognoistres estre propre. On fera l'eschier de ladiēte mixtion à l'enfant, avec le doigt de la nourrice trempé en icelle tant souuent que faire se pourra, ou quelque heure auāt que luy donner à tetter & quelque heure apres. Car par ce moyen preseruez son gosier & trachee artere ou canne du poulmon & icelluy mesme des vlceres, inflammations & autres mauuaises dispositions qui le pourroyent assieger & vexer. Luy ferez aussi vsr de l'hordeat ou bouillie bien faicte avec sucre rosat tabulat & mis en poudre dans iceux, lors sur tout que vous verrez lediēt enfant maigrelet, & tendant à grand dāger de tomber phtisique &

& ethique, comme bien souuēt ad-
uient, quand on mesprise ladicte
toux & enroüure, avec la fieure
lente qui accompagne telles indis-
positions. Et alors ne luy faudra es-
pargner les tartres de marselpain, les
tortugats, les cōfections fort nour-
rissantes, les ius de cœur de mouton
gelées, distillez, & semblables: em-
plastres sur le cerueau, fontanelles,
& autres remèdes propres aux diëts
maux avec l'aduis d'un docteur Me-
decin, sur tout lors que lesdicts sym-
ptomes ne cederont à ceux cy, que
traictons en passant, & plustost fa-
milièrement pour donner leçon &
instruction au commun du peuple
que pour porter aduis ni doctri-
ne à iceux, lesdicts accidëts
se rendans opiniastres
aux legers mis
cy dessus.

G 13

*De la Diarrhée ou flux de ventre humo-
ral appellé arrièremēt qui survient
aux enfāns à la sortie des dents & de
la verolle ou sur la fin d'icelle.*

CHAP. IX.

ENtre autres symptomes & ac-
cidents se présentent souven-
tesfois durant ladicte maladie de la
petite verolle ; principalement au
tēps qu'elle leur sort, en leur denti-
tiō & naissance des dents, quelques
especes de flux de vētre comme est
la diarrhée ou flux de ventre diu-
rue & abondant ou excessif lien-
terique sans inflammation ny vlce-
ration de boyaux ; lequel a double
cause l'une de matiere chaude, desi-
gnée par couleur iaune acre & mor-
dicante, & l'autre de matiere froide
blanchastre & crue ou fott liquide,
Lesquels flux s'ils viennent par voye
de termination & mouuemēt pure-
ment

ment critique & parfaict ou mi-
toyen, comme a esté mis cy dessus
chap. 26. 27. 28. 29, non par mouue-
ment symptomatique cōtre nature,
& que le malade le supporte assez
patiemment, on ne se doibt autre-
ment arrester, sur tout s'ils ne pas-
sent mesure, & ne passent plus de
trois iours: Ains faut laisser leur cu-
ration, à la nature mesmes en gou-
uernant bien la nourrice & l'en-
fant & les gardant, de n'vser de
fruiçts & autres choses laxatiues,
ains leur faisant vser de potages de
bon mouton & chapon, pain grat-
té & semoules, & syrop du petit
absinthe pontique, en baillant vne
once au petit enfant au matin vne
heure après & vne heure auant tet-
ter. - Après lequel dernier, se peut
bailler passez trois heures vn petit
pain gratté, ou d'vn bon consumé
méslé avec deux ou trois cuillerées
d'argent duius du cœur de mouton

de perdrix meslé, avec vn moyeu d'œuf, & vn filet de verjus. On luy peut aussi mettre dessus l'estomach vne once d'emplastre stomachique de Galen, avec vne autre once de l'emplastre de Mastich de Ioubert malaxez ensemble avec huile de Meurthe pour les estâdre apres sur de la peau d'alude, presuposant que la nourrice ne face point d'erreur, ny l'enfant aussi en la maniere de viure. Et si lesdicts iours passez, son ventre ne s'arreste & son flux se red trop violent, sera bon bailler audict enfant la potion suyuant pour ayder le mouuement de nature s'il paroist imparfait.

Prenez reubarbe puluerisée, deux scrupules ou vne petite drachme, corne de Cerf rasée bruslée & lauée avec l'eau rose deux scrupules, demi drachme semence de pourpier, Coralline & santonique de chascun vn scrupule, syrop rosat laxatif de-
my

my once, fyrop de chicoree faict de reubarbe, fix drachmes, cau de pourpier, vne once & demye: meflés cela pour en faire vne potion audit petit. Et vn couple de iours apres l'ayant bien conduict, au iour de ladicte potion luy continuerez le dit fyrop d'absynthe pontique, mineur ou petit au matin comme est dict dessus, & si pour cela ne s'arreste y adiousterez apres le premier iour demye once de fyrop de sorbes oude Ribes, & destréperez la poudre suyuant ou en ses pains grattés ou en sa bouillie faicte de lait de cheure ferré par trois fois avec vn acier rouge ou caillou, ou avec petits cailloux de riuere trois ou quatre en nombre de la largeur & pesanteur d'environ vn testō, si voyez que ledit flux soit excessif & symptomatique.

Prenez perles, coraulx, bol de leuant & corne de cerf, tous prepa-

rez selon l'art de chascun vne drachme, chrystal preparé deux drachmes, galles & noix de cyprez de chascun deux scrupules, giroffles, noix muscades de chascun demy drachme, mastic, vernis, de chascun quatre scrupules, racine de tormen-
 tille deux drachmes, faictes de tout cela vne poudre, de laquelle met-
 trez vne petite cuillerée d'argent
 dans les susdicts potages liez & vn
 peu espais. La nourrice en pourra
 aussi vser, avec ledict enfât, en deux
 ou trois fois plus grande quanti-
 té tant desdicts bouillons que pou-
 dre pour rendre son laiët plus ad-
 stringent & solide & plus cuit &
 plus nourrissant.

*De l'espece du flux de ventre suruenant
 par mouuement symptomatique.*

C H A P. X.

L'Autre espece de flux de ven-
 tre qui s'appelle lienterique,
 auquel

auquel le ventricule & boyaux s'ont
travailliez en leurs fonctions reten-
trices tellement abolies, qu'ils
n'ont assez de temps de cuire par-
faitement & chylier ou le lait
ou les viandes receües en iceux,
ains les laissent couler & descen-
dre trop tost cruds & corrompus
ou tels presque qu'ils ont esté aual-
lez sans estre changez en leur
consistence, couleur, odeur, ou
autre qualité en iceux. Les causes
d'iceluy sont vne intemperature
simple froide & humide en icelles
parties, ou composée & accom-
pagnée de quelque humeur, com-
me est le phlegme salé ou aigre,
ou cholere acre & mordicante, ou
quelque autre chose semblable, ir-
ritant la faculté expultrice pour
la faire descharger trop tost du-
dict lait ou viandes, ne leur don-
nant temps à se cuire bien & deüe-
ment. Tout de mesmes qu'il se fait

à la strangurie ou pissement qui se fait goutte à goutte en la vefcie, ou au tenefme & espraintes, au couronnement & bout du gros boyau, lefquels humeurs ou naiffent en icelles parties, ou leur font mandez de leurs voyfines, ou ils defcendent du cerueau au temps de la dentition, lequel eft le plus mauuais & non fans danger d'eftre long & mal ayfé à guerir ou fe changer en dysenterie ou autres maladies de mauuaife guerifon ou mortelles à caufe d'une fiebure non petite qui les accompagne mais fouuent tres ardente avec vne foif prefque inextinguible & contrainte au grand tetter ou au grand boire, ce qui rend lefdictes parties plus debiles & procliues audict flux qui eft caufe qu'elle a befoin de prompt fecours au commencement par toute forte de remede tant à la nourrice qu'à l'enfant.

Pour

Pourtant on le tiendra en air froid & sec mediocrement, on le nourrira de viandes adstringentes, on vsera de frictions molles & douces à l'enfant par tout le corps: En cherchant & procurant repos à tous deux & les gardant de se chagriner ou fascher & defendant toutes sortes de fruiçts & d'herbes qui leur peuuent lascher le ventre: Et au contraire leur faisant vser de celles qui le leur peuuent ferrer comme boüillons de chapons, mouton, pigeonneaux cuits en eau ferrée, de pain graté ou semole ou ris ou farine de lentilles, ou speaute, ou bouillie faicte avec laiçt ferré ou de quelque hachis de poulpe de perdrix, de leurauds & semblables avec quelque goutte de verjus. Le boire de tous les deux sera aussi de liqueurs adstringentes, & tant petit en quantité que faire se pourra, comme

comme aussi se mettra au moins
deux ou trois heures d'un tetter
ou repas à l'autre, l'eau ferrée &
meslée avec gros vin adstringent
leur pourra estre baillée en fort
petite quantité, ou de syrop de
forbes, de ribes, de roses seches,
de coings ou de grenades. Les
coings, les poires, les forbes, les
mesples, les cornes cuicts ou en la
braise ou bouillis leur sont con-
uenables, avec peu de succe, com-
me aussi les dattes, le ramage de
gennes, le citron confict escorce
ou chair, les noix confictes au suc-
cre & mirabolans. Et de tout vse-
ront, avec discretion & mesure. Et
si suyuant deux ou trois iours plus
tard ledict flus ne cesse, faudra re-
courir à la potion purgatiue mise
au chapitre precedent y adioustant
deux ou trois drachmes de la com-
position du trifera persica, & mes-
mes à la poudre qui est mise apres
pour

pour en mettre dás ses boüillons, & à la potiõ suiuañte cordiale qu'õ luy baillera, apres ladite purgatiõ, à l'heure de son dormir ainũ qu'il s'enfuit.

Prenez trochisques de karabe, trochisques ramihc de chascũ demy drachme, coraux perles & corne de cerf preparés de chascũ vn scrupule, deux scrupules de la poudre de la cõfectiõ de hiacintes, syrop de myrtilles & de sorbes de chascun demy once, eau de plantain vne once & demie, faiçtes de tout cela la susdite potion, que luy baillerez à l'heure du dormir y adioustant par fois, si le Medecin le trenue bõ, vne drachme & demie de diacodium ou syrop de pauot, sera bõ aussi de pour uoir audict mal par remedes extérieurs, tels que sont les fomentations & cataplasmes adstringens. cy apres mis.

Prenez noix de ciprez galles & cupules de glás, de chacune demie once, pepins

pepins , ou grains de raisins , de
sumac, de plantain, de meurthe de
chascun deux drachmes & demie,
coraulx grossiers rouges & blancs
non preparez six drachmes pilées
grossierement, roses fines & balau-
stes de chascū demye poignée, fueil-
les de petit plantain , de petit ab-
sinthe, d'oliuier sauage , de men-
the & sauge de chascun vne poin-
gnée, deux liures & demie de pain
blanc chaud trenché en petits mor-
ceaux, faiçtes tremper toutes lesdi-
ctes choses en suffisante quantité
d'eau de forge y mettant sur la fin
deux pintes de gros vin adstringent
& aspre, apres pressant le tout, gar-
dez à part le marc , & de la liqueur
pressée mise à part à la quantité de
trois pintes faiçtes en des fomen-
tations , avec deux feutres mollers
trépez dedans vn peu chaudement,
sur tout le ventre du petit enfant,
par cinq ou six fois au matin, &

autant

autant au soir, continuât quatre ou cinq iours de suite & y estendant apres sur les draps & linges les cataplasmes suyants.

Prenez le susdict marc, battez le fort en vn mortier de marbre avec vn pilõd de buis, apres passez-le par vn tamis ou crible, & adioustés en l'extraction qu'en ferez mastic, vernis, encēs, storax & benioin puluerisez de chascun demye once, gerofle, muscade, & de sa fleur & canelle grossiere de chascun trois drachmes, d'Acacia, & d'hypocystis de chascun fix drachmes, farine de seigle, poudre de meurthe de chascun troys onces, terebentine quatre onces, huile de coings & de meurthe de chascun deux onces, blanc & moyeu de deux œufs frais, & y adioustant bol fin ou commun & sang de dragon de chascun deux drachmes, battez le tout ensemble pilant ce qui s'en doibt piler pour faire

vn cataplasme, d'excellente vertu & efficace pour corroborer la faculté retentrice & coëctrice desdites parties, & arrester ledict flux lienterique, qui n'estant secouru terrasse vn nombre inestimable de malades comme il se void toutes les années, principalement sur le mois d'Aoust & septembre, auquel ie n'ay iamais experimenté plus beaux remedes que les susdicts accompagnez d'un emplastre sur la commissure du cerueau, sur tout au temps de la dentition des petits enfans.

*De la Dysenterie qui suit la petite verolle
& de la pouruoyance du Medecin sur
sa curation.* C H A P. XI.

Touchât la dysenterie. Il se faut souuenir de ce qu'auons dict que bien souuent lesdictes pustules verolliques viennent non seulement en la peau externe, mais aux

membranes & tuniques internes, & entre autres en celles de l'œsophage, ventricule & intestins, si on ne les fait bien esclorre à temps deu, par le regime & remedes ordonnez, lesquels en estant occupez & sayfis s'ouurēt & s'vlcèrent & rompent souuent de telle façon leurs vlceres, qu'elles excitent à ce petit & tendre subiect & autres grandelets & aduancez en aage ladicte dissenterie, qui est vne difficulté & peine des boyaux avec torsions & douleur desdictes parties vlcerées, avec grand fieure & flux de sang accompagné de phlegme ou mucositez, graisse, ou rascleures qui sont au dedans desdicts boyaux lors que selon le degré diuers de ladicte maladie l'acrimonie de la matiere peccate, peut rōger iusques à la substance interne desdicts boyaux. Les signes de laquelle se voyēt à l'œil es deiections & sorties des excremēts.

Le prognostique n'en peut estre que fort dangereux, & sinistre si l'on n'y pouruoit tost & sagement, sur tout si le corps est plein de mauuais humeurs & de vermine. Pourtant il y faut remedier avec le cōseil du Medecin par la potion suyuantte, ou autre telle qu'il luy semblera meilleure.

Prenez reubarbe en substance bien puluerisé deux scrupules, mirobolans citrins & kebuls frottés ensemble en les puluerisant au mortier avec quelque goutte d'huile de myrtilles de chascune vne demye drachme, de la composition de trifera persica deux ou trois drachmes syrop rosat & syrop de cicoree avec reubarbe de chascun demie once, ou s'il faict sang pur avec rasclures, laissant lesdicts syrops, mettez vne once de syrop de roses seches & vne drachme & demie de la composition dicte michleta destrempât
tout

tout ce que dessus, avec vne once & demye eau de pourpier, racine de tormentille, corne de Cerf preparee, fantonique, & coralline de chacun vn scrupule. Au iour d'apres luy ferés preparer vn clistere de laiët ferré d'vn acier rougi trois fois au feu, prenans de la cola'eure dix ou douze onces, avec lesquelles destremperéz deux drachmes d'amydon bon & fin de bon bled, deux drachmes bol de leuant preparé, & vn moyeu d'œuf, & vne once succe rosat tabulat mis en poudre, y adioustant de ladiçte composition de Michleta demye once pour luy en faire vn clistere qui se pourra aussi reïterer deux ou trois fois, asçauoir vne fois le iour. On pourra aussi mettre sur son estomach vn emplastre de deux onces de mastic, & d'vne once d'emplastre contra rupturá meslés avec huile de meurthe estédu sur d'alude de la grandeur d'vne
petite

petite main, & faiçt en forme d'escuffon y mettant au deffus vn peu de theriebentine, poudre d'aloes, coral & mastic pour le luy faire porter deffus l'estomac iusqu'au nombril, & au deffous luy faudra mettre d'onguēt comitissæ legerement chauffé & continué, & si pōur cela ledit flux ne s'arreste prendra la position suiuantē.

Prenez trochisque de karabé vne drachme, autant de bol de leuant préparé, ou demi drachme d'vn chacun d'iceux si l'enfant est fort petit, vn scrupule de coral blanc & rouge preparez & autant de perles & corne de cerf preparee, deux drachmes de Michleta, & vne drachme & demie de syrop de pauot ou de diacodiū simple ou pour le mieux cōposé, demy once de syrop de mirtilles, & vne once & demy eau de plantain ou pour le mieux du jū

de

de centinodia appellée ronouée ou langue passerine clarifié, & faictes de tout cela vne potion audict petit enfant ou autre grandelet à l'heure de son dormir: luy ferez aussi vser & à sa nourrice d'eau ferrée aux potages & pains grattez, comme aussi de bouillie de lait ferré en y destrempant vn cuiller d'amidon vn cuillier eau rose & vn moueu d'œuf à l'heure du disner, & au soupper autant que ladicte nourrice aussi mange viandes adstringentes, comme coings, sorbes, cormes, ou quernes, prunelles ou agrenes crües si elles sont meures ou cuictes ne l'estant avec eau rose ou de plantain, y mettant vn peu de sucre, peut aussi vser de ris, feues frezees, lentilles pellées, comme aussi de chastaignes blanches & de toutes bouillies à part & bien cuites avec ladicte eau ferrée.

En

en laquelle on aura faict bouillir de mye longe de mouton, avec le rougnon & la graisse d'alentour iceluy, avec vn bon & ieune pigeonneau paru ou tourterelle. N'oubliez aussi à luy faire quelques clisteres si ledit flux sanguinolent ne s'arreste pour tout cela de la façon suiuant.

Prenez ius du petit plantain & de centinodia ou renoïce & du ius d'argentina depurés & clarifiés de chascun deux ou troys onces, lait ferré quatre ou cinq onces, dans lesquelles choses destrempez suif de bouc & huyle de meurthe fondus & meslés chaudement ensemble de chascun vne once & demye, bol de leuant préparé deux drachmes, vn ou deux moyeux d'œufs, tablettes de diatragant pilees vne once & demye, faictes en vn clistere pour le luy bailler tiede & le luy faire garder vne bonne heure, ou tant qu'il sera possible. Et si ledit
enfant

enfant ne guerit pour tout cela. prenez conseil de iour en iour & d'heure en heure de vostre Medecin ordinaire pour luy faire refaire lesdits remedes ou luy en ordonner d'autres selon le degré & temps de la dicte dysenterie.

Du Tenesme & espraintes, premitte en Italien ou esquichement en provençal, & de sa Curation.

C H A P. XII.

ET pource que le Tenesme, premitte ou espraintes & esquichement suit le plus souuent lesdictes especes de flux de ventre, & travail le non seulement fort lesdits petits ou plus aagés, mais ceux qui leur assistent & les seruent mesmement, pour la peine qu'il faut qu'ils prennent à les mettre de coup à coup au net, nous le mettrons apres la-

dicté dysenterie d'autant qu'il est du mesme genre, tirant son nom du symptome & accident qu'il faict, & laisse au gros boyau, par laquelle malade est contrainct de se presser, avec desir d'aller à selle sans faire beaucoup de matiere fecale accompagnée de flegme visqueuse & aucunement sanguinolente ou purulente & boüeuse ou apostemeuse, ne differant presque en rien de la susdicté dysenterie, sinon en tant qu'icelle est seulement audicts petits, gros & droict intestin, avec plus grands efforts, & ceste cy occupe tout le bas avec grandes douleurs & tourments. Estant donc ledict renesme vne maladie qui consiste en la solution de continuité, estant vne exulceration & excoriation & cōme rasclure dudit gros boyau. Il est aysé à iuger, qu'il a vne mesme disposition, & cause que la susdicté. Or ladicte cause est ou sans matiere

re ou avec matiere, & ceste la avec grande froydeur, ou avec grande chaleur: l'vne procedant d'un air ou vent froid, eau ou pierre de semblable qualite, dans ou sur laquelle le malade s'est assis & arreste: L'autre se rapporte à vne cedemateuse inflammation & absces ou humeur acre, comme est le colerique ou flegme sale & mordicant ramasse aux rides & plis du couronnement du siege ou de la matiere fecale retenue au passage d'iceluy, ou hemorroides & broches ou veines internes qui ont accoustumé de receuoir & faire escouler en aucuns le sang melancholique estant pleines & tendues de l'abondance d'iceluy. Bien souuent aussi le dict mal procede de quelque vermine ou grosse ou petite, esmouuant la faculté expultrice à s'en descharger ainsi souuent. Je laisse à part la cause du tenesme qui aduiet

aux femmes grosses ou à ceux, qui ont la pierre ou qui ont pris médicaments mal pilez, acres & picquâts comme scamonée & coloquintes mal preparez, presuposant la cause en venir auxdicts enfans plustost de l'acrimonie & malignité des susdictes humeurs corrópus & quasi veneneux, & de ladiete vermine ioincte avec iceux, & vlceres procurées en ladiete partie par leur passage & decoulement en icelles, ou meismes par quelques pustules verolliques excoriees, lors qu'estant retenues auxdicts intestins superieurs ou inferieurs pour n'auoir esté bié poulées à la peau externe du corps elles laissent ces impressions douloureuses en ladiete partie basse. Au reste la presence, œil, ou prudence du Medecin discernera aisémēt ces causes, pour donner le conseil & remedes conuenables à chascune d'icelles, affin que ledict mal ne se face

trop long & mal aysé à guerir, & quelquefois mortel pour autres maladies ou symptomes d'icelle qu'il pourroit laisser après, s'il n'y est bié & soigneusement pourueu. Parquoy selon ladicte cause particuliere s'accommoderont & le régime de vie & les Medicamens externes & internes. Comménçant par les clisteres deterifs & mitigatifs de la douleur qu'il excite fais comme s'ensuyt.

Prenez horge entier, violettes, & mauues, de chascun demy poignée, graine de lin, & de fœnugrec, de chascun demy oncé; graine d'anis & coriandre de chascun vne drachme, faictes le tout bouillir dans du bouillon de trippes grasses y adioustant sur la fin vne poignée de roses seches, & en la coulateure de neuf ou dix onces destrempez demye once de catholicon & autant d'electuaire lenitif, vn moyeu d'œuf

vne once & demye d'hüylle rofat,
 & autant de sucre & le baillez tie-
 de à l'enfant vous gardant d'of-
 fencer ou bleſſer ſondict Boyau.
 Et ayant continué ledict clyſtere
 deux ou trois foys, dans deux ou
 trois iours, ſi ledict mal continue
 à le preſſer & vexer, luy baillez
 le Medicament ſuyuant par la bou-
 che.

Prenez reubarbe fine puluerifée
 enuiron vne drachme, corne de
 cerf preparée, coralline & ſanton-
 que de chacun vn ſcrupule, trois
 drachmes de Triphera perſica, ou
 autant d'electuaire lenitif, ſyrop ro-
 fat laxatif & ſyrop de cichoree fait
 avec reubarbe de chacun demye
 once, deſtremppez tout cela, avec
 vne once & demye ou deux d'eau
 de pourpier, & luy en faiſtes vne
 potion pour la luy faire boire deux
 heures apres auoir tecté, ſans luy
 bailler rien de deux heures apres.

icelle, lesquelles passées luy baille-
rez, ou sō tectin ou cinq ou six cuil-
liers de bouillon clair & son lait, ou
bouillie bien faicte ou hordeat ou
pain laué quelque demye heure
apres. Ce faict luy pourrez appli-
quer la fomentation suyuant ou
sur le cropion & fondement ou sie-
ge ou deuant sur le petit ventre &
penil tiedemēt deux ou trois fois le
iour avec draps blācs neufs & mol-
lets, en prenant deux pieces d'icel-
luy de l'estendue d'une main pour
estant trempées dans icelles les ap-
pliquer l'une apres l'autre vn peu
chaudement & continuer deux ou
trois iours cela.

Prenez roses fines, fucilles de plā-
tain, violetes, fucilles de meurthe
de chascun vne poingnee, galles &
noix de cyprez de chascū deux dra-
chmes geroffle vne drachme & de-
mye, Coriandre preparé trois drach-
mes, graine de meurthe demy once,

faictes le tout bouillir en eau de forge & gros vin pour luy faire lescdites fomentations, apres lesquelles ferez l'onction suiuite sur lescdites parties.

Prenez onguent de la contesse vne once, huile de mastic & d'amandes douces de chascun demie once, meslez cela & en faictes ladiete onction, continuât le tout par 2. ou 3. iours

Luy ferez faire aussi des iniections avec vne petite syrinque d'argent, par quelque habile chirurgien de la mixtion suiuite.

Prenez trochisques blancs de rhazis vne drachme & demie, laquelle bien pilée destrempez, avec trois onces de lait, & autant d'eau rose, & la luy ferez faire à chascun iour deux ou trois fois, ou apres qu'il s'est sally, & alors que les espraintes le pressent & tourmentent par trop, & apres ladiete syringation se pourra mettre vn peu de l'onguent

l'onguent suyuant, à l'entour & au dedans du siege avec quelque tente mollete ou chandelle de cire, ointe d'iceluy y mettant l'emplastre de la largeur de la paume de la main couuert dudit ouguent après icelle, qu'on luy renouuellera, avec lesdictes fyringations, tant souuent qu'il faudra.

Prenez onguent de tuttie fait avec huile violat au mortier de plomb, onguent blanc canphorat, de chascun vne once, onguent populeõ demie once, tous les plus frais qu'on pourra treuuer, ou bien lavez en eau rose, trochisques de blac de rasis quatre scrupules, poudre de plomb non bruslé faite selon l'art, vne drachme, huile d'œufs, vne once & demye, meslez tout cela ensemble pour faire ledict onguent, que continuerez avec les susdicts remedes quand il sera besoin. Ils se pourroit faire plusieurs autres re-

medes particuliers fuyuant l'exigē-
ce d'autres diuerſes cauſes dudit
mal, qu'il m'a ſemblé bon de laiſſer
à la diſcrétiō dudit Sieur Medecin,
que ie pretends qu'on appelle pour
nous y aider par la methode & re-
medes ſuiuant l'indicatiō d'icelles,
m'eſtant contēté en toutes ces qua-
tre eſpeces ſuſdictes du flux de ven-
tre de m'accommoder à la portée
de l'enfant & autres trauaillēz de
tels accidens dependans de ladicte
verolle, & des perſonnes familières
qui leur adſiſtent.

*De l'auallément, deſcente ou ſortie du greſ-
boyau ou ſiege & muscle ſphincter ou por-
tier fermant & ouurāt le couronnement.*

CHAP. XIII.

A Pres leſdictes eſpeces de flux
de vêtre ſuruiēt vn autre ſym-
ptome & accident. Epigenomene &

ſaiēt

faict comme d'iceux & à leur occasion, c'est à sçauoir l'issüe ou deuallement & descente ou renuersement dudiect gros boyau debilité par la continuelle lubricité & humidité mandée des parties superieures à iceluy, qui relaschent non seulement les deux muscles desquels il est porté & soustenu après s'estre employé & abbaisé pour faire son office d'exclurre les excréments, mais aussi pour l'infirmité du muscle sphincter ou boursier qui ouure, serre & clost le couronnement dudiect siegé pour ne l'ouürir & serret qu'à lors que la faculté animale commandée par la raison & volonté du subiect s'ouure & se resserre bien à propos pour satisfaire à son deuoir. Les causes susdictes sont par fois accompagnées de froidëur externe ou interne, le rendent comme paralytique, & quelquesfois il est saisi d'une inflam-

mation fort grande accompagnée de rougeur, douleur, enfleure, & tē-
fiō, à laquelle faut incōtinent pour-
voir, par le medicament fuiuant de
peur de suppuration & absçés, fi-
stule ou gangrene mortelles.

Prenez onguēt de litarge fait
avec les suc & onguēt blanc cam-
phoré de chascun vne once, onguēt
pōpuleō vne once & demie, onguēt
rosat de Mesue demie once, le blāc
& moyeu d'vn œuf frais, battez tout
cela ensemble, & estant bien meslez
adioustez y demy drachme d'opiū
dissout avec laiēt de fēme & deux
poils de safran puluerisez subtile-
ment, & dudiēt oignement oignez
en lediēt mal & dedans & dehors y
mettant vn emplastre couuert d'i-
celuy sur la partie. Ladiēt inflāma-
tion ne s'accōmodant mettez deux
ventouses sur le dernier des fesses
prés dudiēt siege & tirez par icelles
decoupées deux ou trois onces de
sang.

sang. Et icelle passée oignez ledict fondemēt d'huile rosat & de meurthe meslez avec vn peu de beurre frais, & amadoüant & oignant doucement ladicte partie sortie & abaissée, remettez la avec les deux poulses dextrement & doucement dans son lieu naturel, la suspoudrāt de poudre de liege & de galles meslée en esgale quantité & fort subtiliée, & apres faiētes luy les fomentations suiuantés.

Prenez escorce de grenades, gales, noix de ciprez, cupules de glans de chascune demie once, fleur de roses fines vne once, feuille du petit plantain, peloete, oliuier sauua-ge, renouée, cheurefueil, de chascune vne poignée, alum deux drachmes, bouillez tout cela conquassé dans eau de forge & gros vin adstringent esgale quātité, & de la colature lauez-en & fomētes ledit sie-ge & apres mettez y vn peu du marc
sur

sur d'estoupes molles chaudes dessus, & ne le bouges de six en six heures, quoy qu'il s'y falisse dessus, & ressortant de nouveau cōtraignés le à r'entrer comme dict est, apres y auoit assez seiourné, l'oindrez, sus-poudrerez & fomenterez, & en fin il se remettra au naturel, sur tout luy faisant vser de bouillons & viandes raffraischissantes mediocremēt qui luy tiennent le ventre lasche sans qu'il aye occasion de s'efforcer pour aller à selle.

De la syncope & deffaut ou manquement de cœur par grande foiblesse de l'enfant & de ses remedes & nourriture.

CHAP. XIV.

LEdict mal de la verolle avec ses susdicts symptomes ayant mis en extreme decadence & debilité le cœur il suruiēt à ce petit sujet vne telle syncope ou manquement de cœur qu'il semble qu'il n'aye qu'à

rendre l'ame pour la grande dissipation d'esprits & perte ou consommation de ses chairs musculieuses qu'il demeure lasche & floët de telle façon qu'on luy void les leures & face pailir avec des frequētes sueurs froides, qui sont signes & menasses d'un adiournemēt personnel en la cour souueraine & throne de Dieu, si l'ōny pouruoit à toute heure. Parquoy alors est necessaire de recourir aux consumez de chappons, ius de cœur ou carbonades de moutō, ou de pingēneaux, ou de perdrix, & bonnes distillatiōs faictes en grandes phioles au bain marie simples avec les pūpes de bōnes chairs, ou cōposées avec les cōserues de fleurs cordiales & poudres des electuaires de diamargaritō froid, triasātali, diarrhōdō abbatis, lētitiæ Galeni, diacameronis, dans cinq ou six cuillers desquelles on d'estrempera vn scrupulē à chascune fois de la confection al-

kermès, s'il n'a flux de ventre, ou s'il l'a de la cōfection de hiacintes, corne de cerf preparée, perles & coraux preparez de chascū demi scrupulē : continuant ce soulagement, outre le laiēt, & vne heure apres du tettement d'iceluy, trois ou quatre fois le iour, comme aussi s'ils sont capables de viandes fermes & solides, on leur fera trois ou quatre petits repas avec hāchis de mouton, chappons, pingeonneaux, perdrix, bouillis ou rostis sans les priuer totalement alors du vin, ains leur en baillant du meilleur trempé de sept ou huit parts d'eau : & ne faudra oublier de leur bailler œufs frais en coques ou pochez en eau avec sucre dessus & quelque peu de canelle pilee, ou cūcts en quatre ou cinq cuilliers d'ius desdictes chairs y mettant au dessus du ius d'ozeille & vn peu de la poudre de noix muscade : se pourront

aussi

aussi faire des confectiions nutriti-
ues , comme pastes reales , tortugat
& semblables. Et si la nourrice n'a
assez de laiët, le luy procurer & faire
venir avec bonne & ample nourri-
ture de bons potages & viandes, &
bon vin trépé vn peu plus ou moins
que mediocrement selon sa portée,
ou avec ius de l'herbe de fenouil
fraiche clarifié & baillé en la quan-
tité de deux onces avec autant de
vin blac tous les matins, & si l'enfât
a fieure d'vne drachme cristal & au-
tât de graine de laitues avec potage
d'icelles. Ne faudra aussi laisser en
arriere les potions cordiales si ladite
sincope continue, ny les epithemes
liquides & solides mis sur le cœur.
Mais le principal foulas d'iceluy se-
ra sur le laiët d'vne ou de deux bon-
nes nourrices bien nourries , ou sur
la boullie de laiët de cheure ou bre-
bis avec moyeu d'œufs, & force suc-
cre, y adioustant par fois quelques
cucil

cuillerees de ius du cœur de mouton.

Des purgations bains & onctions qu'il faut faire sur la fin de la petite verolle & de laisser conduire les principales maladies & d'importance avec leurs symptomes aux medecins qui se trouveront presens y appelez.

CHAP. XV.

IVsques icy ie pense auoir satisfait au mieux qui s'est peu à combattre la plus grād part des assauts & symptomes de ceste maladie verollique, mais ce n'est encores tout fait: car souuent toutes les impuretez & mauuais es humeurs ne peuuent entierement passer par l'estamine de la peau du corps percée comme vn crible, quoy que la nature & l'art ayent faiēt tous leurs efforts, ny aussi par lesdictes especes de flux de ventre: mais demeurent à plusieurs,

spaf

spasmes , paraplegies & paralyfies, tremblements, abfcès & apoftemes particulieres, nodes & petits phlegmons , bourfoufflement , ou inflammation , & diuerfes efpeces d'hydropisie en la face, ventre & autres membres,& à d'aucuns grád desgoutement avec fièvre hectique. Pourtant en tel cas fera bon les purger, fyruper & repurger, soit qu'ils ayent esté purgez ou non au commencement. Et ce par la purgation mise cy dessus ou par autre , que lediét medecin present pourra accommoder à l'espece desdicts maux en leur curation par remedes internes & externes pourfuiuis methodiquement par lesdits doctes Medecins, desquels n'ay fait deffainefcrire au long, m'en remettāt à leur presence, adistēce & curation necessaire requise pour lors. Et si lesdicts accidents mis cy dessus ne le tourmentent, ains demeurent

rent seulement maigres, secs & chetifs, galeux & scabreux par toute leur peau, comme aduient le plus souuent s'ils sont trop petits, les faudra lauer durant cinq ou six iour de la decoction de racines de lys & mauues blanches & cōmunes avec leurs fucilles & celles de brāche vricine, scabieuse, fumeterre, lappa, laitues, borragēs, saule, vigne, cannes, graine de lin, & mauues, fleurs de roses violettes & nymphee, & l'ayant bien seché l'oindre tout le corps, le frottant doucement avec le liniment suyuant.

Prenez: beurre frais, graisse de poulaille & d'oye ou canard domestique fraische fondue coulée & lauée avec eau tiede, de chascune deux onces, huile rosat violat de liz & d'amandes douces de chacū vne once & demye, meslés tout cela ensemble pour en faire vn liniment: duquel au sortir dudiēt lauemēt tiede l'en

l'enfant estât seché avec linges mollets vn peu chauffés s'oindra avec la main douce de la mere nourrice, oincte d'icelluy, tout le corps d'icelluy, dés le sommet de la teste iusqu'aux pieds tiedemēt, & ledit lauemēt se continuera, & apres iceluy desseché ladicte onction quatre ou cinq iour cōtinus vne ou deux fois le iour. Que s'il est grādelet & plein de iugement & discretiō le mettrez dans vne petite cuue avec la decoctiō desdites herbes coulee pour l'y tenir & faire baigner dedans tiedement tirant plustost sur le froid que sur le chaud, enuiron vne ou deux heures, commençāt à six ou sept au matin & à trois apres midy. Continueriez ledit bain deux, trois, quatre iours: en changeant l'eau & ingrediēs tous les matins ou l'vn iour & l'autre non, le faisant oindre du susdict oignement bien accōmodé par l'Apothicaire lequel avec le

Mede

Medecin se pouuât treuuer maniables & seruiables, seront ordinairement employez pour la conduicte d'iceux dès le commencement du dict mal iusqu'à leur parfaicte conualescence pour le grand proffit & soulagement desdicts petits subiects, qui s'en remettent par leurs cris & plainctes à la discretion de leurs parens & amys. Ausquels sera fait reproche de Dieu, des hommes & du remords de leur consciences, s'ils ne s'acquittent de leur deuoir à les faire soulager, faisant en cela tort à leurs maisōs & au public, si par leur negligēce ou auarice & peu de pieté & charité ils ne leur procurent la santé: Comme du droict de nature Ciuil & Diuin, ils y sont obligez.

chascun selon les moyens qu'ils auront pour y fournir.

* * *

Conclu

*Conclusion de l'Auſteur de ce liure avec
ſes proteſtations & excuſations
legitimes. CHAP. XVI.*

OR pour ma part iay apporté ſelon la grace & talent qu'il a plu à Dieu me deſpartir, ſinõ auſſi toſt & biẽ que ie deuois au moins le mieux & au pluſtoſt que i'ay peu & ſçeu ce que i'ay recogneu tât par la ſcience que i'en ay eſpuifce & tirée du conſeil des plus doctes, que par l'expérience qu'en ay faiçt à vne dizaine & plus d'enfants que ſa Majeſté m'a donné, dont m'en demeure neuf ſains & bien diſpoſez par ſa ſaincte grace, que parce qu'en ay ordonné & conſeillé, à vn bon nombre d'autres qui m'ont voulu croire, & en la preſeruatiõ & curation dudiçt mal principal & de ſes ſymptomes. Ayant laiſſé à d'autres Docteurs pour traitter les autres

autres especes des maladies des petits enfans, & m'estant arresté à discourir & remedier à ceste cy seulement pour mettre fin à la grãd mortalité qu'en ay veu dés longues années tyrãniser ces pauvres petits enfans, avec la grace de Dieu. Et ay bié voulu faire ce present au public de ce petit traicté ; pour les causes susdites en la preface de ce liure, qu'ay toutesfois esté cōstraint precipiter vn peu trop tost pour le mettre en lumiere plus tost comme abortif, ou comme imparfaict, que trop tardif. pour complaire à certains amys & personnages qui ont autorité sur moy, desirãt qu'il seruit au plustost. Et ce en attendant d'auoir temps & commodité de le mieux recognoistre, & perfectionner, suppliãt humblement Messieurs les Medecins supplier & fournir ce qu'ils treuueront y mãquer en leurs iournalieres visites & ordonnances, pour com-
bler

bler mes tels quels efforts, que dedié à l'honneur de la majesté de Dieu (& apres à madiète Dame & Princeffe d'Orange, pour par son moyen estre desparty à toute la patrie françoise) àfin qu'il luy plaise luy dōner lignee l'augmēter& combler detoute prosperité,& fœlicité, en la tres lōgue & tresheureuse durée de l'vniuerselle paix & fanté de la France sous le sceptre & royale domination de nostre Roy treschrestien & tres-inuincible Henry IIII. & de la perpetuelle & continuele fanté & prosperité de la maison, & race de Bourbon, & de ses loyaux & fideles subiects.



TABLE
DES CHAPITRES
CONTENVS EZ QVATRE

Liures du Traicté de la
petite verole.

Il faut noter que le premier chiffre
denote le chapitre, & le second
denote le folio.

DV LIVRE PREMIER.



Que la petite verole est
maladie propre aux en-
fans & de quel nom se
deriue & de sa distin-
ction avec les varons.

Chap. I. Folio. 1

Des accidens qui accompagnent & suy-
uent. la petite verole principalement.
chap. II.

De la difference sommaire qui est entre la
petite & grosse verole appelée mal de
Naples

T A B L E.

Naples.chap.III.	6
De la definition ou description, de la petite verole, & de ses especes.chap.IV.	8
Du propre nom de ladicte verole selon les anciens & modernes, & de la cause conioincte d'icelle.chap. V.	12
Discours sur la controuerse de la cause conioincte de la petite verole. c.VI.	16
Continuation dudit discours & conclusion sur ladicte cause conioincte dudit mal preuuee par raiſon & authoritez. chap. VII.	18
Confirmation de ladicte conclusion & de la douteuſe preſeruation de ladicte petite verole. chap.VIII.	23
Discours sur les trois cauſes conioincte, antecedente, & externe, concurrentes en la generation de ladicte maladie & de ſa contagion.chap.IX.	26
De la vraye preſeruation & methodique de ladicte petite verole. chap. X.	29
Des ſignes pathognomoniques de la vraye petite verole, & de la cauſe de ſa recheute.chap.XI.	32
Des ſignes precedens & accompagnans ladicte maladie.chap.XII.	34
Des prognostiques diuers des especes de la verole, bien ou mal conduicte. chap.	

XIII.

Du regime de l'air , & des autres choses
qu'il faut obseruer , en la nourriture de
l'enfant verolé. chap. XIV. 36

Asçauoir mon si le laiët se doit donner à
l'enfant ayant la fieure , & comme l'on
se doit porter en iceluy , & autre nourri-
ture en son lieu. chap. XV. 39

Asçauoir mon si le vin est bon aux enfans
verolez & à leurs nourrices. ch. XVI. 42

Du liure second.

REmonstrance en passant à messieurs
les medecins pour les inciter à pen-
ser plus attentiuement que le populaire
à la preuoyance des remedes generaux
pour s'y bien conduire. chap. I. 48

Des diuerses opinions d'aider , ou empes-
cher la sortie des diuerses especes d'e-
xanthemes. chap. II. 50

Accord des opinions contraires sur l'aide
ou empeschement de la sortie des exan-
themes & taches, ou macules de la peau
& du mouuement critique symptoma-
tique, & mitoyen de la nature. ch. III. 52.

En quel mouuement des trois , on doit &
peut aider l'exiture ou arrest des exan-
themes

T A B L E.

themes ou taches de la peau.chap.IV.55

Conclusion du discours des trois mouue-
mens de la Nature , & de l'explication
de certains Aphorismes d'Hippocrates
touchant lesdicts mouuemens. ch. V.57.

De la difference de l'vtilité qui est d'ouvrir
les veines des bras ou iambes , au com-
mencement ou apres la sortie des exan-
themes tac ou taches, chap. VI. 60

De la purgation en quel temps , & com-
ment se doit faire bien à propos & vtile-
ment.chap.VII. 61

Qu'est ce qu'il faut faire au mouuement
purement critique, en l'apparoissance &
expulsion des taches tac, ou semblables.
chap. VIII. 65

Conseil & remedes , pour combattre les
taches malignes & mortelles de soy &
de la vertu des Catharides , entre autres
attractifs de la cause veneneuse. c. IX. 68

Comme se doit conduire le Docte Mede-
cin lors que la Nature n'a entierement
terminé & poussé hors les matieres
malignes des taches. chap. X. 72

Qu'est ce qu'il faut faire au mouuement
mitoyen entre le critique , & sympto-
matique.chap. XI. 14

Qu'il faut proceder aux excretions des

ſueurs vrines, flux de ventre, par meſ-
mes conſiderations qu'aux exanthemes
touchant les mouuemens de la Nature.
chap. XII.

Des nodes, ou phlegmons petits, & grands
& de leur conduicte particulierement, &
autres tumeurs contre Nature & puſtu-
les appellees tac clauellé. chap. XIII.

Des grands abſcez. chap. XIV.

Des Eryſipeles. chap. XV.

Du liure troiſieſme.

A ſçauoir mon ſi la ſaignée peut eſtre
faicte aux enfans d'vn de deux de
trois ans & comme il ſ'y faut porter
chap. I.

Confirmation de la ſaignée des petits en-
fans par raiſon, autorité, & experience
des doctes medecins, & de l'abus des
ventouſes ſur le doz. chap. II.

Practique de ladicte methode theorique
miſe és chapitres precedens, touchant
les mouuemens, & ſur tout au mitoyen
entre le critique & le pur ſymptomati-
tique. chap. III.

De l'vtilité des remedes de la ſaignée &
purgation faicte à propos & deuëment
ſuyuant

suivant la susdicté, methode. chap. IV. 97
 De la prudence du medecin és saignées,
 purgations, scarifications, ventouses, &
 sangsues. chap. V. 99

L'exemple & particuliere practique de
 Galen & autres en la scarification des
 iambes & saignée des parties basses aux
 exanthemes, & morbilles, ou Taches
 apparentes, en temps de pestilence, ou
 malignité de fieure continue. cha. VI. 101
 Du morbille, Tac rouge, violet & noir sur-
 uenants par fois outre les trois especes
 dictes de la verole parmy sa sortie, &
 du prognostique de chacun. chap. VII.

104.

De l'usage & practique particuliere contre
 toutes les especes dudit morbille & Tac
 pour preuenir & combattre le danger
 de mort. chap. VIII. 107

De l'usage, & ayde des sueurs en l'appa-
 rence des taches, ou tac, morbilles &
 exanthemes de toutes sortes & des di-
 uers moyens les prouoquans. ch. IX. 109

Des malheurs qui suyuent la saignée mes-
 prisée au commencement. chap. X. 116

De la purgation discrettement reglée selon
 qu'il s'est deduiet au chapitre precedent
 7. du second liure. chap. XI. 118

Dii

Du liure quatriesme.

DEs moyens pour pouruoir aux acci-
dens qui suyuent ladiète verole
vraye, & les especes particulièrement,
& en premier lieu des aides & remèdes
qui aduancent leur sortie prins par de-
dans.chap.I. 123

Des aides & moyens pour aider par dehors
les eruptions & sorties des pustules &
bourgeonnemens tardifs de ladiète peti-
te verole. chap. II. 127

Remèdes pour dessecher les bourgeons
de la verole apres leur suppuration &
mondification.chap. III. 129

Remèdes & moyens pour faire abolir les
fossetes & creux pendant qu'ils sont frais
en la peau tendre delaissez par les bout-
tons de la verole non bien pensez &
traitez.chap. IV. 132

Procedure plus aisée pour la rougeur &
fossetes du visage apres la verole, & de
moindre despence que ceste là, qui est
mise au chapitre precedent, surpassant
toutes fois ceste cy en bon effect. chap.
V. 137

Preseruation des yeux, pour les garder des
taches

T A B L E.

taches, gresles, ou perles, en leur con-
ionctiue ou prunelle, ou y aduenantes
icelles, comme l'on les en guerira. chap.

VI.

141

De la preservation & curation des vlceres
dedans le nez ou narines. chap. VII.

144

Preseruatiō des vlceres de la gorge, gosier,
Trachee artere, poictrine & poulmōs &
de leur curation. chap. VIII.

146

De la Diarrhoée ou flux de vêtre appellée
arrièremment, qui suruient aux enfans à la
fortie des dents, & de la verole, ou sur la
fin d'icelle. chap. IX.

150

De l'espece de flux de ventre suruenant
par mouuement symptomatique. chap.
X.

154

De la Dysenterie suiuant la petite verole
& de la pouruoyance du medecin sur sa
curation. chap. XI.

162

Du Tenesme, ou esprainctes, premito en
Italien, ou esquichement en prouençal
& de sa curation. chap. XII.

169

De l'aualllement, descente, ou sortie du
gros boyau, ou siege, ou muscle sphin-
ctere dict le portier fermant & ouurant
le coronnement. chap. XIII.

178

De la syncope ou defaut & manquement
du cœur par grande foiblesse de l'enfant
& de

T A B L E.

& de ses remedes & nourriture. ch. XIV.

182

Des purgations, bains, & onctions, qu'il faut faire sur la fin de la petite verole & delaisser conduire les principales maladies & d'importance avec leurs symptomes aux medecins qui s'y treuvent presens y appelez. chap. XV. 186

Conclusion de l'Aucteur de ce liure avec ses protestations & excusations legitimes. chap. XVI. 191

FIN DE LA TABLE DES QUATRE
liures du Chasse-verolle.

P E R M I S S I O N.

IL est permis au sieur Barthelemy Vincent d'imprimer le present Liure avec deffences en tel cas requises. Fait ce 23. Decembre 1609.

S E V E.